

金 金 金

石 石 石

訂 例 要

例 補 例





金
石
要
例

黃宗羲撰



中華書局

金石要例

此據借月山房彙
鈔本排印初編各
叢書僅有此本

四庫全書提要

金石要例一卷。國朝黃宗羲撰。宗羲有易學象數論，已著錄。是編凡爲例三十六則，後附論文。管見九則，自序謂潘蒼崖有金石例，大段以昌黎爲例，顧未嘗著爲例之義，與壞例之始，亦有不必例而例之者。如上代兄弟宗族姻黨，有書，有不書，不過以著名不著名，初無定例，故摘其要領，稍爲辨正，所以補蒼崖之闕。其考據較潘書爲密，然如比干銅槃銘，出王保嘯堂集古錄，乃宋人僞作，夏侯嬰石槨銘，出吳均西京雜記，亦齊梁人影撰，引爲證佐，未免失考。又據孫何碑解，論碑非文章之名，其說固是。然劉勰文心雕龍已列此目，如樂府本官署之名，而相沿既久，無不稱歌詞爲樂府者，是又不必定以古義拘矣。





金石要例

清 姚江黃宗羲梨洲撰

書合葬例

婦人從夫，故誌合葬者，其題只書某官某公墓誌銘，或墓表，未有書暨配某氏也。張說爲蕭灌神道碑云：南城侯之夫婦同刻碑銘，其題贈吏部尚書蕭公神道碑，其妻章氏出事實於內，題則不列。楊炯爲王義重神道碑，其子師本陪葬，亦不別爲標題，自唐至元，皆無夫婦同列者，此當起於近世王慎中集中，如處士陳東莊公暨配黎氏墓表，蓋不一而足也。

婦女誌例

婦女之誌，以夫爵冠之，如某官夫人某氏，或某官某人妻某氏，庾信陳子昂張說獨孤及皆然。若子著名，則以子爵冠之，如柳子厚爲王叔文母誌，書戶部侍郎王公先太夫人河間劉氏。婦人後夫而死者，其葬書附葬，權德輿集中弘農楊氏河東縣君柳氏博陵縣君崔氏，皆如此例。

書名例

碑誌之作，當直書其名字，而東漢諸銘載其先代多只書官，唐宋名人文集所志，往往只稱君諱某字某，使其後至於無者爲可惜。

稱呼例

名位著者稱公。名位雖著。同輩以下稱君。若舊則稱府君。昌黎集中有董府君、獨孤府君、張府君、衛府君、盧府君、韓府君。有文名者稱先生。如昌黎之稱施先生、貞曜先生、皇甫湜之稱昌黎韓先生。友人則稱字。如昌黎之於李元賓、樊紹述、張孝權、元姚牧菴稱趙提刑夫人爲楊君。則變例也。

墓誌無銘例

墓誌而無銘者。蓋序事卽銘也。昌黎張圓之誌云。敍次其族世名字事始終。而銘曰云云。蓋所謂誌銘者。通一篇而言之。非以序事屬誌。韻語屬銘。猶如作賦者。末有重曰亂曰總之是賦。不可謂重是重。亂是亂也。故無銘者。猶賦之無重無亂者也。正考父之鼎銘云。一命而僇。再命而驅。三命而俯。循牆而走。亦莫敢余侮。饁於是。粥於是。以餬余口。比于銅鑪。曰有林左泉。後岡前道。萬世之寧。茲焉是保。漢滕公石銘曰。佳城鬱鬱。三千年見白日。吁嗟滕公居此室。此有韻之銘也。季札之喪。孔子銘其墓曰。嗚呼有吳延陵季子之墓。衛孔悝鼎銘曰。六月丁亥。公假於太廟。公曰叔舅。乃祖莊叔。左右成公。成公乃命莊叔隨難於漢陽。卽宮於宗周。奔走無射。啓右獻公。獻公乃命成叔。纂乃祖服。乃考文叔。興舊者。欲作。率慶士。躬恤衛國。其勤公家。夙夜不解。民咸曰休哉。公曰叔舅。子女銘。若纂乃考服。悝拜稽首曰。對揚以辟之。勒大命。施於烝彝鼎。此無韻之銘也。古來原有此兩樣墓表神道碑。俱有銘有不銘。

單銘例

敘事卽在韻語中。昌黎房使君鄭夫人殯表。大理評事胡君墓銘。盧渾墓誌銘。

墓表例

墓表表其人之大略。可以傳世者。不必細詳行事。如唐文通先生宋明道先生之表是也。歐文胡瑗石曼卿墓表。皆不書子姓。今制三品以上神道碑。四品以下墓表。銘藏於幽室。人不可見。碑表施於墓上。以之示人。雖碑表之名不同。其實一也。故墓表之書子姓。墓表之有銘。不可謂非也。自有墓表。更無墓碣。則墓表之製。方跌圓首可知矣。故與碑分品級。柳州稱神道表。神道與墓無品級之可分也。

神道碑例

柳州葬令曰。凡五品以上爲碑。龜趺螭首。降五品爲碣。方跌圓首。此碑碣之分。是凡言碑者。卽神道碑也。後世則碣亦謂之碑矣。豈以神道二字重於墓乎。地理家以東南爲神道。蘇瓊碑建於瑩北一十五里。亦曰神道碑。宋孫何碑解云。班固有泗亭長碑文。蔡邕有郭有道陳大邱碑文。其文皆有序冠篇末。則亂之以銘。未常以碑爲文章之名也。迨李翱爲高愍女碑。羅隱爲三叔碑。梅先生碑。則所謂序與銘皆混而不分。集列其目。亦不復曰文。戾孰甚焉。今當如班蔡之作。存序與銘。通謂之文可也。

楊炯爲成知禮神道碑。其碑銘之後。有係曰若楚辭。亦自一體。

婦人妃主亦稱神道碑。如張說和麗妃息國長公主李華東光縣主楊綰郭汾陽夫人是也。

行狀

行狀爲議諡而作。與求誌而作者。其體稍異。爲諡者。須將諡法配之。可不書婚娶子姓。昌黎狀墓晉。柳州亦書子姓。狀段太尉。狀柳渾。是也。爲求文者。昌黎之狀馬韓。柳州之狀陳京。白香山之狀祖父。是也。

婦女行狀例

士魯齋曰。衛公叔文子卒。其子請諡於君。曰。日月有時。將葬矣。請所以易其名者。請諡之詞意者。今世行狀之始也。自唐以來。有官不應諡。亦爲行狀者。將求名世之士。爲之誌銘。而行狀之本意。始反矣。觀昌黎。廬陵。東坡三集。銘人之墓最多。而行狀共不過五篇。而婦人不爲也。又知婦人之不爲行狀之意。亦明矣。案江淹爲宋建太妃周氏行狀。任昉裴野皆有婦人行狀。非婦人不爲行狀也。

行述例

歐陽元銘。曾秀才云。行述似翁所作。字木魯。柳作姚天樞。神道碑云。其子侃以公行實。徵錄歐陽發作事迹。此皆與行狀名異而實同也。今既有行實。又有行狀。無乃重出乎。

誄例

誄亦納於壙中。故柳州虞鶴鳴誄云。追列遺懿。求諸后土。誌銘亦可謂之誄。元鄭師山爲洪頤墓誌銘云。其門人俞溥。狀其言行。俾爲之誄。以識其葬。

子孫爲祖父行狀例

今人爲其父行狀。稱父之父爲王父。王父稱爲曾王父。曾王父稱爲高王父。非也。稱謂當以父爲主。故程

員狀父云高祖宏遠曾祖罔禮祖思恭考元休未嘗以員之自稱易之孫遜父銘陳子昂父志皆如之

碑誌煩簡例

誌銘藏於壙中宜簡神道碑立於墓上宜詳然范仲淹爲种世衡志數千餘言韓維志程明道亦數千言東坡范蜀公志五千餘言唯昌黎煩簡得當

先廟碑例

先廟碑見於昌黎集中者皆誌立廟之由本其得姓之始祖功宗德而已至元則侈大其子孫於祖宗反略焉先塋先德昭先等碑名雖不同其義一也宋景濂爲單氏先塋碑銘云公之勳業不附先德之後何以白前人積累之深雖昧於造文之體不暇卹也當知碑先德而後子孫者非文之正體矣

書祖父例

蔡邕祖攜碑云攜字叔業曾祖父勳攜生稜稜生邕邕至勳連身六世故後漢邕傳稱勳爲六世祖而唐穆員爲其父誌高祖上一世則稱五代祖陳子昂誌父墓五世祖太樂生高祖方慶方慶生曾祖湯湯生祖通通生皇考辨柳州父神道表六代祖慶五代祖旦高祖楷蘇子美父誌亦然此當從後

范育呂和叔墓表稱曾祖爲皇考祖爲王考庾承宣爲田布碑稱曾祖爲王大父柳州柳府君墳前石表辭稱高祖王父曾祖王父祖王父

不書子婦例

女子重所歸。故增多書。子婦例不書。楊炯爲曹通神道碑。載子婦一人。以其陪窆於塋內也。裴抗爲田承嗣神道碑。載子婦二人。以其爲宮主也。而宋之黃裳誌夫人黃氏。男三。長曰淳。娶孫氏。次曰昱。娶楊氏。少曰延。娶張氏。楊慈湖誌舒元質云。生子五人。曰鉞。叔晦。壻。曰鉅。娶袁氏。曰銑。前女女焉。曰錯。娶趙氏。曰鏐。叔和之壻也。方大琮誌其父云。大與娶溫陵趙奉直不劬之女。大肆娶福唐林簡蕭栗之孫女。大鏞娶薛左史元昇之孫女。誌林景誥云。男榮公。聘王氏。誌徐母趙氏云。子庭蘭娶俞料院某之孫女。此外諸家文集亦不多見。至元而古法蕩然。閩復廣平王碑。元明善淇陽王碑。無不書子婦矣。

子女不分書所出例

子女皆統於父。雖異母而不分書所出。在唐如權德輿誌李巽三夫人。四子。不言某屬某氏。楊綰作郭汾陽夫人神道碑。六子八女。俱書夫人下。在宋歐公誌蘇子美。先娶鄭氏。後娶杜氏。三子。誌梅聖俞。初娶謝氏。再娶刁氏。子男五人。女二人。溫公誌呂獻可。始娶張氏。後娶時氏。四子六女。荆公誌葛源。元配孫氏。繼配盧氏。三子一女。誌蘇安世。娶葉氏。又娶某氏。子四人。女子五人。誌李宗辨。男十五人。女十九人。俱書夫人下。是皆以父爲主。不必分屬之母。此定例也。然婦無別誌。即附見夫誌之內者。前後夫人。不妨分屬子女。如昌黎碑。楊燕奇夫人李氏。有男四人。女三人。後夫人雍氏。有男一人。女二人。誌昭武李公。三娶。元配章氏。生子紘。女貞。次配崔氏。生緯。紹綰。今夫人無子。自樂天之誌元微之。傳員之誌鄭叔。則皆用此例。逮元姚牧造碑姚樞書。子女某出某出。虞伯生志李應龍。亦書某出。張起岩狀張宏。夫人趙氏姜氏。二

子元節趙出元甲差出此非古法之所有也

婦人誌書子女例

婦人之誌非其所生者不書臨川誌曾易占子男六人煜羣卒宰布瑩女九人其誌夫人吳氏子男三宰卒宰女一

妾不書例

婢妾所生之子書其子不書其母如昌黎誌李邦云夫人傅陵崔氏七男三女邪爲澄城主簿其嫡激鄴城令放芮城尉漢監察御史漣洸潘皆進士是崔氏所生只激一人其六人皆不書其母誌李惟簡云夫人崔氏公有四子長曰元孫次曰元質元立元本元立元本皆崔氏出其二子皆不書其母誌鄭君云初娶韋肇女生二女一男後娶李則女生一女二男其餘男一人女四人其餘者蓋婢妾所生故不書其母李定母仇氏王文公爲李開誌書定於正室浩氏之下不書仇氏古例皆然至元而壞之劉敏中忠獻碑書妾李謙爲張文謙神道碑書側室姚牧菴阿力海涯碑書如夫人潘澤碑子希永他室李出蘇天爵高文貞碑銘子男三人履恆麻夫人出益側室王氏出耶律有倚碑子男五人長楷次朴次權皆伯德夫人出也次栝次檢庶也宋景濂方思菴墓版文稱妾爲少房

不書子姓及妻例

周隋碑誌多不書子姓並不書配其時夫婦各自爲誌故不書至於合葬者夫人必書如庾子山之段永

司馬裔、柳霞侯、莫道生、宇文顯和諸碑是也。後來歐陽爲石守道誌，不書某氏子某名。尹師魯亦不書子名。有書子不書妻。周隋間多有之。至唐如孫逖誌李誌獨孤及誌姚子彥皆然。

單書嗣子例

周隋之碑，單書嗣子，未嘗人人而書也。觀庾子山諸碑，司馬裔但書世子侃，長孫儉但書墩等兄弟，紇子宏但書世子恭等，崔詵但書世子洪度，辛威但書世子永達，段永但書世子崑，唐權文公爲伊慎神道碑，但書冢嗣，餘書息男十六人。

書孫曾例

昌黎碑誌只書子女，更無書孫者。孫逖爲杜義寬碑，書孫以表其墓。權文公爲王端碑，書孫以其葬。王父白樂天碑，崔孚書孫以其求文。張曲江爲呂處真書其孫女，爲李仁瞻書其孫，李迴秀爲裴希惇書其孫，皆以立碑，故其他皆不書也。至宋則皆書孫矣，不特孫也，且及於曾孫矣。盧陵蘇明允誌書孫，曾子固誌錢純老書孫，東坡狀溫公書孫，子固誌沈率府子三人某某，孫八人某某，曾孫三人某某，東坡范蜀公誌書曾孫女，虞伯生碑張宏範書孫六人某官某，曾孫十一人某官某。

書孫壻例

巢水心臧氏誌書孫壻，虞伯生狀董文用孫女十人，長適某某，次適某某，馬石田銘劉伯戶孫女四人，一適某某，一適某某，唐時孫壻不敢入碑誌，或列之碑陰，與先友一例。權文公之碑王光謙是也。

書外甥例

十父公仁壽縣太君徐氏誌書外孫四十七人。

孫不宜分屬例

今世書孫。又各於孫下系以某子所出。爾雅曰。男子謂姊妹之子爲出。公羊傳曰。蓋舅出。以鄒世子巫與魯襄公俱是宮外孫。同所自出。故凡言出者。因母姓而云也。今以出屬之於父。不通甚矣。且父在則孫俱屬之父。子不私爲一己之有也。

不書壻祖父例

女子所適。但書壻之姓氏。不當及壻之祖父也。元明善誌袁夫人史氏。書女長適宋相史莊肅公嵩之之孫似伯。次適工部尚書余天任之孫昌期。次適宋資政殿大學士史岩之之孫益伯。以顯宦著名。故變例書之。蘇天爵誌袁文清女四人。其二人書適故觀文殿大學士趙某孫由錫。適故相史忠定王元孫公佾。其二人書適同知袁州路總管府事趙孟貫。適處州儒學錄余應渠。二書祖父。二不書者。以著名不著名也。然已爲濫惡。今世不論馬醫夏畦。一概書某某之子若孫某。不知何謂也。

書生卒年月日例

凡書生卒。止書某年某月某日。不書某時。

書國號例

凡書出仕於前代，稱其國號，當代稱皇，柳州柳渾陳京狀是也。

書妻變例

張景妻唐氏再適，宋祁載之。

書女變例

韓文公三女，其長女初適李漢，改適樊宗懿，誌書壻左拾遺李漢，登集賢校理樊宗懿，次女許嫁陳氏，三女未笄，登即壻之別名，此皇甫持正變例也。

塔銘例

柳州云：凡葬大浮圖，無窆穴，其於用碑不宜，然柳州之爲浮圖碑多矣。今釋氏之葬，不曰碑銘，而曰塔銘，皆猶存不宜用碑之義也。

書僧臘例

今之爲塔銘者，於其終也，書僧臘若干，世壽若干，因話錄云：釋氏結夏，隨其身之輕重，以臘爲其人，解夏之後，以本身驗於臘，人輕則爲妄，想耗其氣血矣。今作伏臘之臘，失其義矣。柳州書爲僧凡若干年，其壽若干，或凡年若干，爲僧若干，非。

僧稱公例

凡僧稱某公，皆以其名。宋景濂塔銘可按也。今乃以其字稱公，此村野駟鳥所爲。奈何文章家因之。

寺碑例

宋景文筆記云。碑者施於墓則下棺。施於廟則繫牲。古人因刻文其上。今佛氏揭大石鏤文。士大夫皆題曰碑。銘何耶。按儀禮。碑在堂下三分庭之一。當碑揖。宗廟路寢庠序皆有碑。所以識日景。是不特繫牲而用也。碑於釋氏無礙名義。如王簡棲頭陀寺碑文。其來已久矣。

銘法例

祭統銘之。樣稱美而不稱惡。此孝子孝孫之心也。故昌黎云。應銘法。若不應銘法。則不銘之矣。以此寓褒貶於其間。然昌黎之於子厚。言少年勇於爲人。不自貴重。誌李于單。書服泌藥一事。以爲世誡。誌李虛中。亦書其以水銀爲黃金服之。冀不死。誌王適。書其謾侯高事。誌李道古。言其薦妄人柳泌。皆不掩所短。非截然諛墓者也。

附

論文管見

昌黎陳言之務去。所謂陳言者。每一題必有庸人思路共集之處。纏繞筆端。剝去一層。方有至理可言。猶如玉在璞中。鑿開頑璞。方始見玉。不可認璞爲玉也。不知者求之字句之間。則必如曹成王碑。乃謂之去陳言。豈文從字順者。爲昌黎之所不能去乎。

言之不文。不能行遠。今人所習。大概世俗之調。無異吏胥之案牘。旗亭之日歷。卽有議論敘事。敝車羸馬。終非鹵簿中物。學文者。須熟讀三史八家。將平日一副家當。盡行籍沒。重新積聚。竹頭木屑。常談委事。無不有來歷。而後方可下筆。顧儉父以世俗常見者爲清真。反視此爲脂粉。亦可笑也。

作文雖不貴模倣。然要使古今體式。無不備於胸中。始不爲大題目所壓倒。有如女紅之花樣。成都之錦。自與三村之越異其機軸。今人見歐曾一二轉折。自詭能文。余嘗見小兒搏泥爲炆。擊之石上。鏗然有聲。泥多者聲宏。若以一九爲之。總使能響。其聲幾何。此古人所以讀萬卷也。

敘事須有風韻。不可擔板。今人見此。遂以爲小說家伎倆。不觀晉書南北史列傳。每寫一二無關係之事。使其人之精神生動。此類上三毫也。史遷伯夷孟子屈賈等傳。俱以風韻勝。其填尙書國策者。稍覺擔板矣。

文必本之六經。始有根本。唯劉向會衆多引經語。至於韓歐融聖人之意而出之。不必用經。自然經術之文也。近見巨子動將經文填塞。以希經術。去之遠矣。

文以理爲主。然而情不至。則亦理之郭廓耳。廬陵之誌交友。無不嗚咽。子厚之言身世。莫不悽愴。郝陵川之處真州。戴剡源之入故都。其言皆能惻惻動人。古今自有一種文章不可磨滅。真是天若有情。天亦老者。而世不乏堂堂之陣。正正之旗。皆以大文目之。顧其中無可以移人之情者。所謂剗然無物者也。

作文不可倒卻架子。爲二氏之文。須如堂上之人。分別堂下臧否。韓歐曾王。莫不皆然。東坡稍稍放寬。至於宋景濂。其爲大浮屠塔銘。和身倒人。便非儒者氣象。王元美爲章質誌。以刻工例之。微明伯虎太兩傳。查八十許以節使。抑又下矣。

廬陵誌楊次公云。其子不以銘屬他人。而以屬修者。以修言爲可信也。然則銘之其可不信。表薛宗道云。後世立言者。自疑於不信。又唯恐不爲世之信也。今之爲碑版者。其有能信者乎。而不信先自其子孫始。子孫之不信。先自其官爵贈諡始。聊舉一事。以例其餘。如某主江西試。以試策犯時忌。削籍。有無賴子高守謙。結黨十餘人。恐喝索賂。某不應。遂掠其資以去。某尋死。崇禎初。昭雪死事者。竄名其中。得贈侍讀學士。今其子孫乃言逆奄竊情。某抗疏糾參。幾至不測。閣臣爲之救解。已而理刑指揮高守謙等。緹騎逮訊。某辯論侃侃。被拷掠而斃。崇禎初。贈侍讀學士。諡文忠。脫空無一事。實不知文忠之諡。誰則爲之。且并無賴之高守謙。授以僞官。真可笑也。潘汝楨建逆奄祠於西湖。某已臥病。不能起。在敗。遂有言某人祠不拜。

爲守祠奄人所挺。因而致死。以之入奏者。今無不信之矣。近見修志有無名子之子孫。以其父祖入於文苑。勃然不悅。必欲入之儒林而止。嗚呼。人心如是。文章一道所宜並廢矣。所謂文者。未有不寫其心之所明者也。心苟未明。劬勞憔悴於章句之間。不過枝葉耳。無所附之而生。故古今來不必文人始有至文。凡九流百家以其所明者。沛然隨地湧出。便是至文。故使子美而談劍器。必不能如公孫之波瀾。柳州而敘宮室。必不能如梓人之曲盡。此豈可強者哉。

金
石
例
補

郭
麐
撰

中
華
書
局

金石例補

此據式訓堂叢書
本排印初編各叢
書僅有此本

金石例補序

金石之有例。自潘景梁始。其括例止取韓柳二家。明王止仲推而廣之。以唐宋十五家之文爲準。而斷以己意。本朝黃梨洲爲金石要例。補潘氏之闕。其言體要亦備是已。朱錫鬯檢討嘗言。碑誌始於東漢。欲取洪氏隸釋隸續臚列其體製。以補三家之例。而未及爲。臆質性褻昧。問學荒落。然竊嘗有意於碑版之文。以爲泥於例。則官府吏胥之文移也。不知例。則鄉農邨學究之論說也。顧既以爲有例。則必從其朔。東漢其鼻祖矣。輒不自揆。取洪氏之書。爲之條分而縷析之。間以後人祖述之繇。附識於後。魏晉六朝。上承漢氏。而下啓唐人者也。其有可采。亦著於篇。而唐人不及焉。爲金石例補二卷。插架寡陋。遺漏疏略。所在多有。幸同志有以正之。助之云爾。嘉慶十有六年六月二十有七日。吳江郭麐祥伯甫序。

金石例補後序

東里生問於頻伽子曰。碑碣之盛。其漢氏之車歟。其體以鋪陳終始爲能。六朝唐初人因之。自昌黎韓氏出而體變。歐陽王曾韓之別子也。其法皆準于太史公書。循一端論全體。與初製大殊焉。後有作者。亦規其初製歟。頻伽子曰。吾聞諸李氏習之之論行狀矣。曰。世之作行狀者。或虛加美辭。曾不直敘其事。善惡混然不可明。若使指事書實。不飾虛言。則必有人知其真僞不然者。彼習之之言。非有見於文字之極弊歟。蓋古時風氣澆樸。其見於頌讚無諛辭。故出其文。昭然其信其言之實。而作者恆不署名於其間。文字漸繁。遂有以文字售其欺者。唯言出于有道德之人。始傳信焉。又其言非有實指。其體終不能遠於流俗。昌黎歐陽王曾之文。所謂指事書實者也。于是而必規其初體。得毋蹈習之之所譏歟。夫箸述之事。因時而遷。屢變則又從其朔。說經者之反乎鄭虞也。論詩者之反乎蕭選也。皆從其朔也。而碑碣有不能非事會使然歟。雖然。可變者辭。而不可變者修辭之例也。說經殊而訓詁不殊。論詩殊而安章宅句不殊。又豈特碑碣然哉。彼循其變而昧其初之例。其失固惟固斯陋。吾病夫固陋者之託於韓歐陽王曾之文。而不能自擴也。又病夫規韓歐陽王曾之文。而言不實。亦不足傳信也。時頻伽撰金石例補甫成。東里生因鉅次其言以爲後序。嘉慶十有八年七月朔後二日。仁和汪家驊撰。

目錄

卷一

序先世例

書遠祖不書三代例

書遠祖三代不書名例

書遠祖及父不書祖父例

書祖父官位不書名例

書某人孫例

書祖考兼書從父例

書祖父兼書兄例

書高曾祖名字官位例

書祖父術業例

書父不書祖父例

書祖父及世父叔父例

金石例補目錄

書父叔父及弟若子例

不書祖父書某人弟例

書高曾祖父變例

三代皆書字及夫人例

書子女例

書弟及子名字官位存沒例

書子名及官位例

諸子不悉書例

書妻子女及壻變例

書夫人例

書附葬例

備書兄弟例

書卒年月日例

書卒年月日變例

書年壽卒葬日例

書卒官例

卷二

不書名書字例

書立碑人例

子爲父立碑例

孫爲祖立碑例

妻弟立碑書名例

舅之孫立碑書名例

弟及子作碑書名例

同官作銘書名例

書制銘人例

弟銘兄例

書造碑人例

書居憂例

書賜弔贈官賜諡例

金石例補 目錄

碑題書郡邑例

書私諡例

碣題官位例

附書他人例

一碑二人作例

頌後有序有亂有詩例

墓碑有亂例

書助葬人例

壽藏銘例

書童子例

書故民例

書遷葬例

婦人碑誌書夫官位及姓氏例

婦人墓誌以夫姓冠氏上例

諸王不書姓例

誅序用韻不用韻例

穿中有記例

碑前列上書制詔例

碑後列制詔例

應詔作銘書年月例

書奉敕例

書作文變例

紀功碑書其人三代例

金石訂例目錄

卷之一

碑誌訂始

碑附書碑額碑陰式碑碣制度

神道碑

家廟碑

先廟先塋先德昭先等碑

德政碑

墓誌銘附制度

墓表

志墓石附石人羊虎柱制度墓圖制度

哀誄

行狀附式

金石訂例 目錄

金石訂例 目錄

賜碑名號

金石文訂始

金石文

卷之二

金石訂例上二十六條

書先代例

書宗族姻黨例

書妻不書妻例

書妻祖父例

書子姓例

不書子婦例

子女不分書所出例

婦人誌子女或書或不書例

妾不書例

書孫曾例

書承重孫曾例

書壻及孫壻例

不宜書壻祖父例

書孫不宜分屬例

書母例

書二母例

書子女年歲例

承繼子應書例

書妻變女變例

誌銘書法大要例

書合葬例

書耐葬例

婦女碑誌褒揚例

卷之三

金石訂例下三十一條

婦女誌及行狀例

墓表及神道碑例

婦女亦有神道碑例

子孫爲祖父行狀例

子孫爲祖父碑誌例

碑誌繁簡宜各當例

書職名例

題不書官與姓例

不書姓例

碑誌必實書例

贈封必書例

子女爲僧尼必書例

碑誌宜直書名字例

書題例

稱呼例

書年月日例

墓碑神道碑例

誌銘不妨雜出姓氏等類例

書死例

書葬例

書國號例

名號稱呼例

時忌字樣例

碑誌文辭各異例

銘法例

風水年月之謬例

金石訂例 目錄

僧碑宜書不宜書例

論僧臘及僧碑公例

寺碑宜書不宜書例

卷之四

金石推例八十條

韓昌黎二十條

李習之四條

柳子厚十三條

歐陽公十四條

尹河南一條

曾南豐五條

王荊公七條

蘇東坡二條

朱子三條

陳后山二條

黃山谷二條

陳了齋三條

晁濟北一條

呂東萊二條

附學文訂例

制式

語式

詔式

表式

露布式

檄式

箴式

銘式

金石訂例

目錄

金石訂例 目錄

記式

贊式

頌式

序式

跋式

節錄金石例所載作文法度十八條

梨洲先生論文管見八條

金石例補卷一

清 吳江郭 廖祥伯撰

序先世例

漢國三老袁良碑。君諱良。字厚卿。陳國扶樂人也。厥先舜苗。世爲封君。周之興。虞闕父典陶正。嗣滿爲陳侯。至元孫濤塗。初氏父字。立姓曰袁。魯僖公四年。爲大夫。哀十一年。頗作司徒。其末或適齊楚。而袁生。獨留陳。當秦之亂。隱居河雒。高祖破項。實從其册。天下既定。還宅扶樂。孝武征和三年。曾孫幹。斬賊公先勇。拜黃門郎。封關內侯。食遺鄉六百戶。後錫金紫。遷脩城之鄒。幹薨。子經嗣。經薨。子山嗣。傳國三世。至王莽而絕。君卽山之曾孫。

按此碑序。袁良得姓受封。傳爵國除。凡一百六十餘言。而世次助業。瞭然在目。最爲可法。昌黎諸碑表。皆本於此。不及其祖若父者。助爵無可紀。故略之也。

漢敦煌長史武班碑。武君諱班。字宣張。昔殷王武丁。久伐鬼方。元功章炳。勳藏下府。官族分析。因以爲氏焉。武氏蓋其後也。商周遐積。歷世壙遠。不隕其美。漢興以來。爵位相踵。按此序其得姓之始。而世次略之。

書遠祖不書三代例

漢泰山都尉孔宙碑。君諱宙。字季將。孔子十九世之孫也。

此特書聖裔尊聖也。世次不書略也。

書遠祖三代不書名例

晉右將軍鄭烈碑。遠祖以亢節著德。揚光漢氏之初。近葉以儒術博古顯名。中興之後。逮至曾祖先生。皇祖徵君。蹈明哲之高尙。嘉肥遯而不悶。顯考將作大匠。實有茂德。載在國策。

按漢人碑文。其述先世。多不著其名。此碑遠祖卽鄭君。不肯名籍者。所謂亢節著德也。

書遠祖及父不書祖父例

漢孔謙碣。孔謙字德讓者。宣尼公廿世孫。都尉君之子也。孔彪碑亦然。

按書宣尼尊聖也。不書祖略也。

書祖父官位不書名例

漢郎中王政碑。君諱政。字季酺。漢中太守之孫。從事掾之第三子也。

漢封邱令王元賓碑。君諱閭。字元賓。御史君之孫。茂材君之子也。

書某人孫例

漢司隸校尉楊淮碑。大司隸孟文之元孫也。

按二王君碑。皆著其祖父之官。而不著其名。楊淮碑止著其祖。後人志慕之文。或止稱其顯聞於時者。

祖此例也。其王政碑曰：第幾子。又一例也。隸續云：凡稱元妃、元子、元兄、元舅之類，皆以長言之。二楊俱曰元孫，猶元士然，以元爲美稱也。按楊淮碑兼及其弟，故洪氏云然。費鳳碑又有元弟，亦美稱也。

書祖考兼書從父例

漢平都相將君碑：君之祖考闕，爲交州刺史，從父交州太守闕，能輸力王室，以篤臣節，功列天府，令聞不已。

書祖父兼書兄例

漢高干長夏承碑：君諱承，字仲竟，東萊府君之孫，太尉掾之中子，右中郎將弟也。

書高曾祖父名字官位例

漢綏民校尉熊君碑：君高祖父諱自汝南吳闕子靈，干元孫，大漢龍興，闕舉鄉闕，拜議郎，南巡郡國，封龍中闕祖父晏闕舉闕大司馬，郊隆闕曾祖父範，督郵守長州辟元闕，君闕應上計闕祖父師闕上計掾君闕，字漢舉，更督郵主簿五官。

按隸釋云：漢人敘先世，但云某家之孫、某家之子，既不名其父祖，亦不著其德美。此碑獨異於他刻，高曾之間，又有祖父晏其上闕文，蓋伯叔祖也。祖之下云君高字漢舉，喬上亦闕一字，必父也。愚謂漢人立碑皆門生故吏士民頌功德之詞，意在其人之事迹，不必詳其先業。非若後世埋銘神道碑之文也。然唐人銘誌亦不必盡詳視其可紀與否耳。末流諛墓，遂非此不足以爲悅矣。亦文章升降之會也。

書祖父術業例

漢鄭令景君闕銘。君治歐陽尚書傳。祖父河南尹。父步兵校尉。業門徒上錄三千餘人。明明側陋。遠近照聞。

漢衛尉衡方碑。君之烈祖。少以儒術。安貧樂道。履該顏原。兼修季由。聞斯行諸。砥仁礪剛。土塔夷愍之貢。經常伯之寮。位左馮翊。先帝所尊。垂名竹帛。考廬江太守。兄雁門太守。長發其祥。

書父不書祖父例

漢郎中鄭固碑。君諱固。字伯堅。著君元子也。
漢孝廉柳敏碑。君父以孝廉除郎中。闕部府承。

書祖父及世父叔父例

漢議郎元寶碑。魯相之孫。成德。東安平令。北海相闕守之弟子。中平令兄子也。

書父叔父及弟若子例

漢安平相孫根碑。府君諱根。字元石。司空公之伯子。樂安太守之兄子。漢陽太守侍御史之兄。乘氏令之老。

按書其子。而曰某之考。亦蒙上文。遣辭不得不爾。非有例也。

不書祖父書某人弟例

漢金鄉長侯成碑。君則上黨太守之弟。

書高曾祖父變例

漢尹宙碑。君東平相之元。曾稽太守之曾。富波侯相之孫。守長社令之元子。

按漢碑敘其先世。多曰某人曾孫。某人子。如楊淮碑。^{已見}及屬國侯李翊碑。君諱翊。字輔國。牂柯太守曾孫。謁者孫。從事君之元子。是也。此碑稱元曾。而去孫字。亦類例也。

三代皆書字及夫人例

北魏刁遵墓誌。高祖協元亮。某官夫人彭城曹氏。父羲。某官。曾祖縣太倫。某官夫人闕。父雍淑和。某官夫人琅邪王氏。父闕。

按漢人書其祖父。止有官闕。而不書名。從未有及其配者。此則既著高曾祖父之官位與名。而並著其字。既書其夫人。而又著其夫人之父。可謂詳矣。此亦世變文繁之一驗也。惟遵之夫人。與其父高允別書於銘詞之後。則爲無體。潛研堂金石跋尾。以爲墓志之變例。然不可從也。

書子女例

漢孫叔敖碑。陰相君有三子。長子卽封食邑固始。少子在江陵。中子居三闕。又世伯子字子仲。治產於續虛。有六男一女。大子字長都。次子蘭卿。次弟字仲陽。次弟字叔通。次弟字衡公。次弟字劉卿。此續宗六父也。孝伯子字文闕。亦不仕。學治產於材虛。亦有六男一女。大子字惠明。次弟字次卿。次弟字聖公。次弟字

稚卿。次弟字彥卿。次弟字少都。此材宗六父也。

按此列孫氏宗族於碑陰。序次特詳。然皆字而不名。又以長子爲大子。次子以下。蒙其兄而稱弟。此亦當時偶成之體。可備一例也。

書弟及子名字官位存沒例

漢綏民校尉熊君碑。君同產弟望季公。質性伉儷。史魚之直。吏功曹列掾督鄆都梁長。早終。君長子稱孝。存。姿操敦良。耽志好學。博覽雅藝。闕三奏辟召于州終。

書子名及官位例

漢梁相費汎碑。二子纂闕鳳。由宰府至堂邑令。政九江太守。

諸子不悉書例

北魏刁遵墓誌。小子整等。泣徂年之箭駿。痛龜筮之告祥。

潛研堂金石跋尾云。遵有子十三人。誌惟云小子整等。不及諸昆弟之名。蓋遵沒時。整兄楷尙均已先卒。古人文字之質而簡如此。而諸弟姪不以不列名爲嫌。又徵古風之淳厚也。按少詹殆有慨於流俗。乞志墓者。以不備書其子姓爲不樂。故爲此論。攷之漢人表志。皆不盡書其後嗣之名也。

書妻子女及壻變例

北魏故懷令李君墓誌銘。妻恆農楊氏。父談。爲郟州主簿。息女孟宜。年用六。適恆農王。壻。郡中正。息女

嬖妾遙遼西常彪侍御史。息女仲妃適武威賈子謐。涼州治中。息道沖。息女婉華。息女休顏。息女四神。息道逸。年十六。息道棲。年十三。

按中州金石志。此數行皆在銘詞之後。與刁遵誌書妻及妻父於後相同。而子女錯雜書者。當以年齒爲後先也。女作息。女子作息。各著其年。而女之夫各著其官。亦後世誌銘之濫觴也。

書夫人例

漢金鄉長侯成碑。夫人以延熹七年。歲在甲辰。十一月三日庚午。遭疾終。末一行。

漢郎中馬江碑。夫人冤句曹氏。終溫淑慎。咸曰女師。年五十五。建寧三年十二月卒。

按漢碑無書配者。其書夫人。皆已卒。蓋祔葬於兆。故及之也。又夏瑱碑。姆會謝氏。並靈合楨。則合葬而書也。

書祔葬例

漢郎中鄭固碑。先是君大男孟子。有楊鳥之才。善性形於歧嶷。罔見於垂髫。年七歲而夭。大君夫人所共哀也。故建闕共墳。配食斯壇。以慰考妣之心。又其辭曰。嗟嗟孟子。苗而弗毓。奉我元兄。修孝罔極。魂而有靈。亦歆斯勒。

漢郎中馬江碑。君中弟字文緒。位主簿督郵。志行闕期。落落自有大節。年卅二。早世短折。

按鄭碑。當是其弟爲之。而以鄭君之子祔葬。所謂共墳配食。奉我元兄也。馬碑隸釋。以爲當是因夫人

卜兆。以馬君共塋。又同時改厝。其季故作碑并言之。夫人已見前書夫人例中。

備書兄弟例

漢北軍中候郭仲奇碑。君惠兄竹邑侯相。次尙書侍郎。次濟北相順弟臨沂長。次徐州刺史。次中山相。次雒城令。咸以孝廉。公府茂選。貞亮皦白。翼翼瑛彥。配周之八。爲國楨幹。又聞兄疾病。率爾逝將。念妨弟路。遜位恬榮。

按此碑先書元城君之第四子。後敍自周以來。至漢家世。而於三兄四弟。備載官位。一以見其門伐之盛。一以見郭君友于之篤。昌黎李虛中墓志。詳書其兄事。柳州楊憑等誌銘。正似此也。

齊卒年月日例

漢謁者景君墓表。維元初元年五月丁卯。故謁者任城景君卒。

漢郎中王政碑。脩仁不闕。卒從氛暴。以元嘉三年春正月戊寅。闕旣沒而否。

漢平輿令薛君碑。惟延熹六年春三月。平輿令薛君卒。烏虜哀哉。吏民其咨。咨君之德。迺建碑石于墓之側。

按景君薛君兩碑。皆先書卒之年月日於前。及敍立碑頌德之意。隸續所云。薛君碑前有序。凡三十六字是也。王政碑。則卒年月日書於中。隸釋曰。東都自路都尉始見墓闕。蓋表阡銘壙之濫觴也。有文而傳於今。則自景君始。

書卒年月日變例

漢嚴訢碑。惟漢中興。卯金休烈。河平元年。歲治東宮。星屬角房。月建朱鳥。中呂之均。萬物慈躬。華實青蔥。蛟行蠕動。咸守厥常。人物同授。獨遭災霜。顛隕徂落。壽不寬宏。經說三命。君獲其央。年六十有九。禮勝蚤夭。嗟痛兮。嗚呼悲傷。故著名詠。增嘆歎歎。發憤援筆。舒應曠咽。其辭曰云云。

隸續以爲庚寅四月。又云。漢人銘墓皆一律。此先書其所終歲月。及壽攷。踰百言始云。伊歎嚴君諱。新字少通。遂述其行事。與曹鳳兩碑略同。

漢外黃令高君碑。光和七年。龍在困敦。月次鶉火。六日丙申卒。

按兩碑所紀歲月。皆不直書。柳子厚伯祖妣李夫人墓誌銘云。萬其芳。壽且康。大梁鶉火沈幽光。用此例。

書年壽卒葬日例

漢平都相蔣君碑。闕天不弔。降災賢良。闕六十有五。元嘉二年三月甲午卒。

漢郎中鄭固碑。乃遭凶慙。年卅二。其四月廿四日。遭命隕身。痛如之何。

漢議郎元賓碑。年卅八。延熹二年二月閏卒。

漢中常侍樊安碑。年五十有六。以永壽四年二月甲辰卒。

漢冀州從事張表碑。春秋六十有四。以建寧元年三月癸酉寢疾而終。其年十有一月丙寅克葬。

按漢碑。或止書卒。或書卒之年月。而不書其年壽。其書年壽者。皆在卒年月日之上。其例如右。卒例止日。而不時。近俗爲行述。輒書某時。非古也。張表碑。兼書葬日。又司徒掾梁休碑。亦有二月戊寅卜葬之文。蓋綦備矣。

書卒官例

漢平都相蔣君碑。六十有五。元嘉二年三月甲午卒。遭疾不豫。闕卒於官。
漢益州太守高頤碑。建安十四年八月於官卒。

金石例補卷二

不書名書字例

漢故民吳仲山碑。熹平元年十二月上旬。吳公仲山。少立名節。約身剛己。隸釋云。碑無其名。仲山其字也。按此州縣民人所立。不名。亦尊愛之也。

書立碑人例

漢謁者景君墓表。碑陰有諸生服義者十五人。隸釋以爲卽立碑之人也。

漢郟令景君闕銘。諸生服義百有餘人。迺刻此石。

漢北海相景君銘。於是故吏門生相與論曰。

漢議郎元賓碑。於是族舊門人。莫不傷瘁。立銘以詠君德。

漢郎中王政碑。於是門徒士大夫。闕君。咸有闕。乃相與立石表行。以闕後。

漢平輿令薛君碑。吏民其咨。咨君之德。乃建碑石於墓之側。

按以上皆門生故吏戚族所立。故碑止言其立石之意。而不著其名。或有碑陰者。卽詳列其爵里名字。他皆類此。柳子厚殿中侍御史柳公墓表云。凡我所知。哀痛無極。又云。故友諸生。宗人外姻。號慟會葬。又云。於是汝南周公巢等。相與琢石書德。用闕不朽。皆祖述漢碑例也。

子爲父立碑例

漢中常侍樊安碑。嗣子遷實。以幼弱夙敍王爵。而喪所天。禮備復位。以延熹二年冬十有一月。自上蒸祭。乃尋惟烈考恭修之懿。勒之碑石。俾不失隨。

漢司隸校尉魯峻碑。息散不才。弱冠而孤。承堂弗構。析薪弗荷。

按金石萃編云。子爲文某石以述其父。漢碑中創例。愚謂此瀧岡阡表之所放也。

孫爲祖立碑例

漢梁相費汎碑。適孫均。感奚斯之義。刊銘元石。旌勒厥美。

按隸釋以爲此碑其孫所立。故其銘有穆穆顯祖之文。

漢國三老袁良碑。於是厥孫衛尉滂。司徒掾宏。嗣乃刊石作銘。

漢從事武梁碑。孝子仲章。季章。季立。孝孫子儁。躬修子道。竭家所有。選擇名石。南山之陽。擢取妙好。色無斑黃。前設壇垣。後建祠堂。良匠衛改。雕文刻書。羅列成行。據騁伎巧。委蛇有章。垂示後嗣。萬世不忘。

按此皆子孫銘其祖考。其自述如此。隸釋以爲武梁碑。兼列良匠之名。與邨閭頌列石師孔耽。神祠碑所刊治師名同。後世署刻石者姓名。實始此矣。

妻弟立碑書名例

漢堂邑令費鳳碑。惟熹平六年。歲終於大荒无射之月。堂邑令費君寢疾卒。烏乎哀哉。於是夫人元弟。故

關守卜允追而誄之。

舅之孫立碑書名例

費鳳別刻金石錄作碑。君舅家中孫甘陵石勛字子才載馳載驅奔於喪庭肝確意悲感切傷心瞻彼碑誄懷之好音司馬慕蘭相南容復白圭仰之以彌高崇之而彌堅不堪哀且思敘詩之一篇庶幾告子夏起夫子之所言。

按以上二碑前碑妻弟卜君所作後碑舅之中孫石勛所作兩碑文皆五言後碑所云瞻彼碑誄懷之好音謂卜君碑也此又與張公神祠碑同例柳子厚房公碑陰杜牧之韓文公孔子碑陰意皆同此弟及子作碑書名例

漢純令劉修碑三弟龍純孿哀孔懷孤生儻協郃長號思慕立此碑銘以表行

同官作銘書名例

漢敦煌長史武班碑於是金鄉長河間高陽史恢等追惟昔日同歲郎署云云故闕石銘碑以旌遺德焉漢孝廉柳敏碑堂無文麗墓無碑識建寧元年縣長同歲健爲周國趙臺公憤然念素帛之義其二年十月甲子爲君立碑傳於萬基因勒銘歎之

按前碑云同歲隸釋以爲同年爲僚也後碑同歲蓋謂同年被徵也又云漢碑多門生故吏所立至於同歲爲之者唯此二碑一死一生而寮友之好不變如此愚謂後世銘誌之文多有述交際愛厚之情

者。蓋本於此。

書制銘人例

北魏陸希道銘側題字。前涼州刺史兼吏部郎中。陳郡袁翻。字景翔。制銘。

按孟縣志。此條不係銘詞之前後。在誌之側面。別刻一行。又云。魏碑誌皆不著撰人名字。此獨并著其字者。殆因繭有大名。愛而重之。故書以爲光美耳。愚謂好名之心。後世益甚。漢人有書作銘頌之人者。卽其立石之人。自表慕仰之意也。此字不知其子孫刻之。抑袁君自喜而署之。要之開後人譏文書片之漸矣。

弟銘兄例

漢郎中鄭固碑。琦瑤延以爲至德不紀。則鍾鼎奚銘。昔姬闕武。弟述其兄。綜闕行於蔑陋。獨曷敢忘。乃刊石以旌遺芳焉。

按此碑詳味其語。琦瑤當是鄭君之弟。昔姬以下闕二字當是旦頌。言周公能述武王也。漢人遣詞無所拘忌。大都如此。

書造碑人例

漢巴郡太守樊敏碑。建安十年三月上旬。造石工劉盛息操書。

按漢碑或書某年月日造。或書立。其鄰閭頌書石師。孔耽碑書治師。武梁碑書良匠。此云息操。是石工

之子。而能大書深刻。足可傳矣。武氏石闕銘。有石工孟季季弟卯造此闕。華山碑。有郭香察書。古人不肯苟於其事如此。

書居憂例

漢安平相孫根碑。遭公夫人憂。

漢涼州刺史魏元丕碑。遭秦夫人憂。

按孫君父爲司空。故書公夫人。秦卽太字。漢制惟列侯母稱太夫人。此借稱以尊之也。昌黎孟貞曜墓誌。稱尊夫人。

書賜弔贈官賜諡例

漢太尉劉寬碑。天子閔悼惻怛。內發手筆爲策。闕涕咨嗟。使右中郎將張良持節臨弔。贈車騎將軍印綬。位特進。賜舍贈綬。有加典禮。復使五官中郎將何夔持節諡曰昭烈侯。

按漢碑皆稱君。此碑文內稱公者。以劉君爲三公。舉其官也。通鑑錯父呼錯爲公。亦呼其官耳。後世遂爲年老及有爵之通稱矣。

碑題書郡邑例

漢光祿勳東平無鹽劉府君碑。

隸釋云。漢人銘墓。以郡邑題其首者。所見唯此一碑。

書私諡例

漢司隸校尉魯峻碑。於是門生汝南千闕沛國丁直。魏郡馬萌。勃海呂闔。任城吳盛。陳留誠屯。東郡夏侯宏等三百廿人。追惟在昔。游夏之徒。作諡宣尼。君事帝則忠。臨民則惠。乃昭告神明。諡君曰忠惠父。按此爲私諡書碑之始。

漢元儒先生婁壽碑。國人乃相與論惠處諡。刻石作銘。

按唐韓昌黎銘孟郊。書貞曜。柳子厚表陸先生。書文通。皆用此例。隸釋以爲羣下私相諡。非古也。未流之弊。故更相標榜。其論甚正。

碑題官位例

漢車騎將軍馮緄碑。一要金紫。十二銀艾。七墨綬。

此總計其所歷之官也。隸釋云。緄終於廷尉。而以將軍題碑者。重金紫也。

漢司徒掾梁休碑。辟司徒府秉忠。蹈絜。又勞滿奏上。拜新都令。

隸續云。梁君終於邑宰。而以公務掾書其額者。重內也。

按漢人碑。題官位。或舉其大。或稱內官。後世如昌黎爲愷文公神道碑。題稱故相。權之卒時。已罷相矣。後漢許慎本傳。稱爲浚長。而其子上說文表。稱故太尉南閣祭酒。此官范史不載。未審其就辟與浚長孰爲先後。嘉慶五年。杭州西湖立許叔重祠。欲書栗主。而疑其官位。後遂兩存之。若準此例。則書公府。

官爲得矣。

附書他人例

漢綏民校尉熊君碑。故長沙茶陵長文春。字季秋。質摯貞良。慈仁汎愛。治天官日度。風角列宿。明知聖術。在官修德。民歌遺風。春秋七十。以道阻遷。宗允不紀。故爲宣昭。故桂陽陰山豫章。闕長。重安侯相。杜暉。字慈明。體質宏亮。孰仁好道。治易梁邱。春秋公羊氏。綜覽百家。無所不甄。典歷三城。居官清惠。遺愛在民。春秋七十終。族後闕。故因顯德。以示來允。

按隸釋云。似是同郡盛德之士作文者。惜其無紀錄。故附之左方也。愚謂此必熊君之故交同官。故附著之。若柳子厚亡友獨孤君碣。先侍御石表碑陰之類也。至王介甫處士徵君墓表。王止仲謂敘德履。而并其同志之友二人者。敘之。則正如洪氏所言表微闡幽之義也。

一碑二人作例

漢張公神碑。朝歌長鄭彬立。左右闕表神道。樹碑廟堂之前。銘勒神懿。光祕後昆。其辭曰云云。後又云。暨黎陽瑩。謁者李君。畏敬公靈。好鄭長文。微奉佐工。惻愍殷勤。作歌九章。頌公德芳。其辭曰云云。

按此張公不知何神。鄭長旣爲立碑作銘。而謁者李君好鄭之文。又作歌九章。共刻於碑。此亦一例也。後世誌銘。有序與銘各一人者。祖此也。

頌後有序有亂有詩例

漢司隸校尉楊孟文石門頌。四言有韻。後有序。亦四言。有韻。凡六句。又漢都鄉孝子嚴奉碑。有頌。又有亂。曰云云。

隸續曰。其碑有文有頌。又有亂。曰十六句。又有數行載邑官甄表之因。又漢李翕郿閣頌。乃作頌曰。皆四言。頌末云。乃詠新詩。下復有詩如騷體。皆變例也。又按北海和景君銘。乃作誄曰云云。後復有偈曰云云。隸釋云。偈者亂省其乙也。則墓銘亦有此例矣。至校官碑。先稱誄而後乃稱序。體例倒置。未可以爲法也。

墓碑有亂例

漢巴郡太守樊敏碑。其辭曰云云。又有亂曰云云。

此與嚴舉碑同例。又廣漢屬國候夫人碑。有嘆曰。

書助葬人例

漢堂邑令費鳳碑。故吏故郭施業字世堅。義民堂邑。誠忠。隸釋云。誄之後載施業誠忠二人。竭力送終之事。業者。郭士之故吏。忠者。堂邑之義民。皆費君之舊部也。初敍誠忠。早喪慈考。母服未除。有廣陵之役。聞訃來奔。祖載還鄉。及泉隧有期。復載經杖。扶號柩棺。列種奇木。建三磐石。此其大略也。

按碑陰。亦載兄弟甥舅。諸姑伯姊。夫人孝孫。悲傷哀痛之意。宛轉淒切。昌黎柳子厚墓誌。書兄弟盧遵。亦此例也。

壽藏銘例

漢梁相孔耽神祠碑。年逾皓首。縣車家巷。黃髮荒_{即不老}。背有胎表。孫息教姚。驩樂壽考。觀金石之消。知萬物有終始。圖千載之洪慮。定吉兆於天府。目覩工匠之所營。心欣悅於所處。云云。末有小字數十。文曰。子得述父。臣得錄君。故紀焉。時君年七十二。自所立作。君子颯作內至。疑有脫誤。時已更郡諸曹史督郵。承詔紀行。手自注石。治師同縣朱遙朱祖。并作畜郭。

隸釋云。孔君自作壽藏。而厥子刊石也。按趙岐嘗自作圓石而書其辭。皆後人生壙自誌之始也。

書童子例

漢童子逢盛碑。童子諱盛。字伯彌。薄令之元孫。遂成君之曾孫。安平君之孫。五官掾之長子也。

按碑稱童子年十有二。又云。慈父悼傷。割哀回鯁。於是門生東武孫理。下密王升等。感激三成。一列其義。故共刊石。敘述才美。以銘不朽。蓋其父之門生爲立石者。童子書字。以成人禮之也。此一例也。後韓柳女挈下孀女子銘記。皆自爲之辭。其體例漸廣矣。

書故民例

漢故民吳仲山碑。隸釋云。漢之仕者。沒有遺愛。其州縣之民。爲之采石鑄銘。則自稱曰故民。吳公匿迹輅光。不答聘召。作碑者。體其謙晦之操。故以民稱之。故民者。物故之民也。

按後世如重其人之字。則以字稱之。柳子厚尹師魯墓誌之類是也。從人所尊。如貞曜先生。徂徠先生。

墓誌是也。有官位而不足以爲其人之重。則不書者。處士侯君。孔處士墓誌之類是也。墓銘舉例。論之甚詳。而其例實放於此。

書遷葬例

北魏司馬元興墓誌銘。以永平四年歲次辛卯十月癸亥朔十一日癸酉遷葬在溫城西北廿里。記之。按元興卒於太和十七年。相距已十九年矣。其誌略不及其事。迹有銘辭而無銘曰之文。皆與他碑異。抑或先已有志。懼再告也。其紀遷葬之年月日甚備。此正例也。

婦人碑誌書夫官位及姓氏例

曾任城太守夫人孫氏之碑。

按漢氏婦人有碑誌者絕少。侯成馬江二碑中及夫人者。皆以附葬故。夏瑒碑亦然。洪氏所錄。惟司農劉夫人碑。其額已闕。廣漢屬國候夫人碑。以中有臧侯苗焉之文。始知其姓。兩碑文之首。皆以夫之官位系之。其題額而署姓氏者。實始於此。漢兩碑文皆古簡。此碑序其爲女時勸父辭婚。爲父所異。爲婦而舅姑嘉其淑婉。姊姒宗其德音。沒而三子追懷罔極。刻石爲辭。蓋已漸就繾綣矣。至北魏司馬景和妻墓誌銘。其前書魏代揚州長史南梁郡太守宜陽子司馬景和妻墓誌銘。則書其夫之官位。并其姓名而書之矣。然妻之姓氏。則見於文內。而首行不著。至唐人則夫之官位姓氏。與其妻之姓氏皆列於首行。如昌黎監察御史元君妻京兆韋氏夫人墓誌銘之類甚多。若柳子厚爲王叔文母墓誌。而以子

之官位系之。尤爲無法。不可爲典要矣。

婦人墓誌以夫姓冠氏上例

周庾信。周大將軍。隴東郡公。侯莫陳君夫人竇氏墓誌銘。後魏驃騎將軍。荊州刺史。賀拔夫人元氏墓誌銘。周大都督。陽林伯長孫夫人羅氏墓誌銘。

按子山諸誌。皆以夫姓冠其氏。又有譙國公夫人步陸孤氏。起國公夫人紇豆陵氏。安昌公夫人鄭氏。諸文。其標題不書姓者。以有封號。或作配宗室也。

諸王不書姓例

梁沈約齊故安陸昭王碑文。公諱緬。字景業。

按王止仲墓銘舉例。有宗室不書姓例。本此。

誄序用韻不用韻例

魏曹植王仲宣誄。晉潘岳楊荊州誄。宋謝莊孝武貴妃誄。序皆有韻。潘岳夏常侍誄。馬汧督誄。宋顏延之陽給事誄。陶徵士誄。序皆無韻。

按漢人銘墓之文。亦曰誄。是誄與誌銘相通也。其序如誌。辭如銘。若意主於詞。則序可簡而用韻。王仲宣誄之類是也。若欲敘次其功績行義。必累幅乃能盡者。其序用韻。則不能委曲達意。馬汧陶徵士之類是也。此無定例。可以意得之。漢人頌功德之碑。其辭曰之前。亦多有韻者。占人文簡故也。

穿中有記例

隸釋有張賓公妻穿中二柱文。洪云亦埋銘之椎輪。

按詳其文有於穿中造內棲柱作崖棺。則柱爲寢棺之用。而因刻石以記之。柳子厚爲其女兒墓志書於蓋石。亦此意也。近鮒埼亭集文屢用穿中字。

碑前列上書制詔例

漢孔廟置守廟百石孔和碑。

魯相史晨孔廟碑。

宏農太守樊毅復華下民租碑。

無極山碑。

按此四碑。孔和碑凡有三式。三公奏天子一也。朝廷下郡國二也。郡國上朝廷三也。隸釋謂可以見漢代文書之式者。其碑建於永興元年。其奏事及詔皆在元嘉三年。末後有譜曰云云。史晨碑止載建寧二年三月。魯相臣晨長史臣謙上尚書云云。無詔。末後卽銘其響。孔廟後碑曰。欽因春饗。導物嘉會。述修辟雍。社稷品制。卽上尚書。參以符驗。乃敢承祀。餘昨賦賜刊石勒銘。并列本奏。則序其得請之後。饗廟之禮也。樊毅碑亦止載光和二年十二月。宏農太守臣毅上尚書云云。末後一行云。宏農太守上祠西嶽。乞縣賦發差。復華下十里以內民租田口算。然亦無制可之文。其修華嶽碑乃有上奏復賦。克朕

帝心之語。無極山碑。載光和四年。太常臣耽承敏。上尚書云。制曰可。其書到言以下。有南陽馮府君。於是言太常奏可。其年八月丁丑詔書。聽其九月更造神廟。恢拓祠宮。乃立碑銘德頌山之神焉云云。前列書詔。後述建立。敘次周悉。爲碑文正例。東坡表忠觀碑。正合此例。

碑後列制詔例

漢中常侍樊安碑。制詔中常侍樊安。宿衛歷年。恭恪淑慎。嬰被疾病。不幸蚤終。今使湖陽邑長劉摎。追號安爲騎都尉。贈印綬。魂而有靈。嘉其寵榮。烏乎哀哉。延熹元年八月廿四日丁酉下。

按此在墓碑之後。殆追刻也。潘岳馬汧督誄。亦載贈官制詔。則悲其被誣而獲申耳。

應詔作銘書年月例

梁陸倕石闕銘。於是歲次天紀。月旅太簇。皇帝御天下之七載也。下云。爰命下臣。式銘盤石。新刻漏銘。上云。歲纏閭茂。月次姑洗。皇帝有天下之五載也。下云。天監六年。太歲丁亥。十月丁亥朔。十六日壬寅。漏成進御。下云。乃詔小臣。爲其銘曰。

按石闕卽是年所立。漏刻造於五年。成於六年。故兩書年月也。

書奉敕例

後周華嶽頌。末二行。使持節驍騎大將軍。開府儀同三司。大都督。司宗治內史。臨淄縣開國公。方紐于璫。造此文。車騎大將軍。儀同三司。縣伯大夫。趙興郡守。白石縣開國男。南陽趙文淵。字德本。奉敕書。

按此後周天和二年所立文與書並列其名唐瑾作頌文中已有乃詔史臣語故止書名者著奉敕也其兼書字者與陸希道銘同奉敕之名始見於此亭林以爲撰人書人列名始此則非也

書作文變例

東魏太公呂望表末曰通直散騎常侍聘梁使平東將軍中書侍郎恆州大中正修左史汲郡太守程子容山行之文

按此既著其名又著其字不曰撰而曰某之文皆變例也又先刻盧無忌舊文於前而後書作碑之故亦後來第二碑之所放也

隴東王感孝頌時開府中兵參軍梁恭之盛王象隸騎兵參軍中嗣邕微學摘藻並應命旨俱營頌筆按此作文書碑之人俱序於文中不更列名亦變例

紀功碑書其人三代例

漢曹全碑君諱全字景完敦煌效穀人也高祖父敏舉孝廉武威長史巴郡胸忽令張掖居延都尉曾祖父述孝廉謁者金城長史夏陽令蜀郡西部都尉祖父鳳孝廉張掖屬國都尉丞右扶風陰陵侯相金城西部都尉北地太守父鮪少員名州郡不幸早世是以位不副德

按此是曹君門下掾部功曹等所立紀功者而書其高曾祖父綦詳亦漢碑中所少見生存而曰諱則當時往往如此其序征和德爲戍部司馬又足以證劉攽無己字之確也

金石訂例

鮑振方學

中華書局

金石訂例

此據後知不足齋叢
書本排印初編各叢
書僅有此本

芳谷鮑君。以元潘蒼崖金石例。黃梨洲要例二書。朝夕研玩。著爲金石訂例四卷。質於余曰。潘例援據該博。惜其過寬。黃例考核精當。惜其過隘。乃合兩書訂之。未知無悖於義否。余閱而歎曰。誠哉有用之書也。自昌黎振起八代之衰。其法流傳。至元廢壞。得蒼崖論於前。梨洲論於後。固已揭要提綱。爲千古示之規範。細按之。良不免寬隘之目。今訂其寬。一歸嚴密。訂其隘。一歸詳審。蒼崖梨洲有知。能不引爲知己乎。爰書數語。以誌欽佩。

道光丁未仲夏同邑王振聲拜譔。

例言

一潘蒼崖黃梨洲兩先生既成例於前必取而訂之者以其有所未盡不無可損益處非敢自矜撰述。
一蒼崖先生金石例十卷凡昌黎文所有悉引之俱言例之可從梨洲先生要例三十六條繁引博涉俱言例之不可從故合而訂之。

一鄙見裁酌處皆參諸經籍稽諸古大家著作必求義例安適無詭於理無悖於法然後載筆非敢師心自用。

一金石例所載文式雖舉其概以例其餘而掛漏既多終無所用今姑闕之。

一墓銘例舉例一書其法概倣蒼崖頗嫌瑣碎故推例所載皆擇其語之尤精有當於文律者餘皆削之。
一是書凡引兩先生語必冠以某曰鄙見則加擬方按三字其兩先生語下用擬方按者論定其是非也。
至訂始一卷附錄學文凡例十三條則本蒼崖而裁取之。

金石訂例卷一

清 常熟鮑振方芳谷學

元潘蒼崖先生金石例十卷。國初黃梨洲先生以其未嘗著爲例之義。與壞例之始。爲不必例而例。因作要例三十六條。辨正之。洵足爲蒼崖功臣。蓋非蒼崖無以識例之備。非梨洲無以知例之嚴。二者相救。不可偏廢。竊不自揣。合兩先生書。輯爲金石訂例四卷。以質當世之能文章者。

碑誌訂始

碑

金石例曰。禮記。公室視豐碑。鄭氏註曰。斲大木。形如石碑。樹槨之四角。穿中爲鹿盧。下棺。以絰繞。天子六綽。四碑。諸侯四綽。二碑。大夫二綽。二碑。士二綽。無碑。又喪大記註。天子用大木爲碑。謂之豐碑。又祭義。賈氏麗牲疏曰。宮必有碑。士婚禮聘禮。入門當碑揖。則大夫士廟內皆有碑。鄉射鄉飲酒禮。當碑三揖。則庠序之內皆有碑。振方按。廟庠序內之碑。皆用石爲之。若葬碑。取懸繩索。則以木爲。金石例又曰。宗廟立碑。所以繫牲。後人因於其上。紀功德。此碑字以石。秦以來之制也。

附書碑額式。金石例曰。碑字八分書。謂之題額。篆字則云篆額。略舉一二。附於後。以見其概。云。

夫子廟堂碑。

駕部郎中程浩撰。

朝議大夫尚書武部員外郎琅邪顏真卿書。

朝散大夫檢校尚書都官郎中東海徐浩篆額。

唐天寶十一載歲次壬辰四月乙丑朔二十二日丙戌建。此在記文後。

柳州羅池廟碑。

尚書吏部侍郎賜紫金魚袋韓愈撰。

中書舍人史館纂修賜紫金魚袋沈傳師書。

朝議郎桂管觀察支度使試太常寺協律郎上柱國陳曾篆額。此與建立俱在記文後。

長慶二年正月十一日桂管都防禦先鋒兵馬使朝散大夫試左衛長史孫季雄建立。

附碑陰式。

蘇東坡韓文公碑小字本後云軾再啓。

附諸碑碣制度。

金石例曰五品以上立碑。螭首龜趺。二品以上。高不過一丈二尺。五品以上。高不過九尺。七品以上。

立碣圭首方趺上高四尺

神道碑

金石例曰。釋名云。碑。被也。葬時所設。臣子追述君父之功。以書其上。事祖廣記云。晉宋之世。始又有神道碑。天子及諸侯皆有之。其刻文云。某帝或某官。神道之碑。其初由立於葬兆之東南。地理家言。以東南爲神道。故以名碑。振方按。後漢簡王薨。詔修塚塋。開神道。註云。建石柱以爲標。謂之神道。是則神道之名。漢時已有。特晉宋後。易以碑刻爾。又要例曰。柳州葬令。五品以上爲碑。降五品爲碣。此碑碣之分。凡言碑者。卽神道碑也。後世則碣亦謂之碑矣。豈以神道二字重於墓乎。地理家以東南爲神道。蘇環建碑。塋北一十五里。亦曰神道碑。未知何取。又墓銘舉例曰。神道碑。其題有二。有碑額之題。其詞簡。有碑文之題。其詞繁。蓋旣題其額。又題其文也。故韓文有錄碑額題者。如曹成王劉統軍之類。有錄碑文題者。如唐故銀青光祿大夫。守左散騎常侍。致仕上柱國襄陽郡王。平陽路公神道碑銘。唐故江南西道觀察使。中大夫。洪州刺史。兼御史中丞。上柱國。賜紫金魚袋。贈左散騎常侍。太原王公神道碑銘之類。是也。若蘇文忠公所謂碑身上。更不得寫題。想是古制。如此又謂碑有只用大額。向下小字。直寫文辭。不煩寫題目者。施於宸奎閣。及藏經碑耳。非謂墓碑也。公又嘗與人簡云。墓表小字。亦有題目。額上不當復云墓表。故別寫四大字也。以此推之。墓表用兩題可見。但洪括隸釋所載額字。有多至二十餘

者。題額之簡。似非定例。蘇文忠謂別寫四大字者變也。

家廟碑

金石例曰。家廟碑。立之家廟前。唐人三品以上得立。餘不得立碑。與墓碑制度同。曾見永寧縣西寺。有文潞公家廟碑。是溫公所撰。與墓碑同。

先廟先塋先德昭先等碑

要例曰。先廟碑。見於昌黎集中者。皆敘先廟之由。得姓之始。祖功宗德而已。又金石例曰。先塋先德昭先等碑。似與墓誌神道碑不同。以創建於國朝。前唐宋金皆無之。所書三代并妻子例。似與神道碑墓誌不同也。又要例曰。先廟先塋先德昭先等碑。名異實同。宋景濂爲單氏先塋碑銘云。公之勳業。不附先德之後。何以自前人積累之深。雖昧於造文之體。不暇惜也。當知碑先德而後子孫者。爲非文之正體矣。

德政碑

金石例曰。陸龜蒙叢書曰云。古者懸而誌。用木書之。以表其功德。因留之不忍去。秦漢以降。生有功德事者。亦謂之碑。而易之以石。此德政有碑之始也。

墓誌銘

金石例曰：齊太子稚妃將葬，議立石誌。王儉曰：石誌不出禮經。宋元嘉中，顏延之爲上球作墓誌，以其無銘誌，故以紀行，自爾遂相祖習。其前若魏侍中繆襲，改葬父母墓，下埋文，將以陵谷變遷，使後人有所聞知。然但書姓名、歷官、祖父姻媾而已。又馮鑑云：西京雜記：前漢杜子春臨終，作文命刻石埋於墓前，恐墓誌自此始。據方按：孔子銘季札之墓，比干以銅盤刻文誌墓，開元時耕者得之，則墓之有誌，其來已久。特文之繁簡不同耳。唐宋後，又有誌文、壙銘、葬誌、權厝誌、歸祔誌、墓版文、墓輒銘、世德銘、石塔銘、蓋石文、石槨銘、壙記、埋銘、墓識、壽藏銘、生壙志。雖其體大約與墓誌相似，而用各有宜。

附墓誌銘制度

儀禮注云：用石二片，其一爲蓋，刻云：某朝某官某公之墓。無官，書其字曰：某君某甫。其一爲底，刻云：某官某公諱某字某某州某縣人，考諱某，某官，母某氏。某封某年月日生，歷任某官某處，某年月日終，葬於某鄉某里。年若干，妻某氏。某人之女子某某，某官，女某適某，官某人，婦人夫存，有官，則蓋云：某官某人妻某封某氏之墓。無官，則云某君某甫妻某氏。底云：年若干，適某氏。因夫與子致封號，無則否。葬之日，以二石字面相向，而以鐵束之，埋於壙前，近地面三四尺。又金石例云：墓誌納之壙中，柩前平放，其狀如方石，斗二底，撮面平，大小無定。上一斗於平面上題某官某公墓誌銘，下一斗上作小字書前一行某官某人墓誌銘，并引或並序，或有序後書序及銘，刻畢以丹填之，上下二斗字

並用丹填。二斗相合。以薄石片搗起。搗石如錢大。厚薄亦如之。但要二石實相壓著。墓在平地。則於壙面近南先布磚一重。置石其上。又以磚四圍之。而覆其上。若墓在山側峻處。則於壙南數尺開掘地深四五尺。依此法埋之。振方按儀禮注所載其法簡更無文辭。想是古制。金石例所載制度周密且有序銘。其爲後世之制無疑。

墓表

金石例曰。家禮云。墳高四尺。立小碑於其前。亦高四尺。趺高尺許。孔子防墓之封其崇四尺故以爲法。註云。碑石闊尺以上。其厚居三之二。圭首而刻其面。如注之蓋。乃略述其世系名字行實。而刻於其左。轉及後右而周。婦人則俟夫葬乃立。振方按此墓前碣石也。古無墓表。故略述其世系名字行實。金石例竟以墓表當之。恐未的。蓋表與神道碑不同。今制三品以上神道碑。四品以下墓表。第神道碑則螭首龜趺。而表則圭首方趺。與碣同。故悞混之耳。梨洲先生曰。有墓表。不得更有墓碣。可知表與碣之分矣。自唐宋後。又有殯表。阡表。殯記。墳記。石碣銘。墳前石表。皆大同而小異。

志墓石

金石例曰。志墓石。立於墓前。上題云。某人之墓。無文辭。墓雖無碑者。亦當立此以爲志。
附石人羊虎柱制度

金石例曰。葬儀一品石人四事。石羊石虎石柱各二事。二三品減石人二事。四五品又減石柱二事。其制蓋起於秦漢。事祖廣記引彖穀子曰。秦漢以來。帝王陵寢。有石麒麟邪兕虎之屬。人臣墓有石人羊虎柱之類。皆表飾墳壙。如生前儀衛。唐王建北邙行云。山頭澗底石露稀。盡向墳前作羊虎。是也。

附墓圖制度

金石例曰。作方石碑。先畫墓圖。或作圓像。內畫墓樸。各標其穴。爲某人。其石嵌之。祭堂壁上。無祭堂。則嵌圍牆上。凡祭堂中宮左右。建瓦用花頭。皆寫云某氏千秋墓。輒亦然。墳塋一品四面各三百步。長周不等者。以積步折之。餘准此。二品二百五十步。三品二百步。四五品一百五十步。六品以下。一百步。庶人三十步。若經恩賜。則不在步限之內。

哀詠

金石例曰。周禮小史掌卿大夫之喪讀誄。誄累生時行迹者也。又柳州虞鳴鶴誄云。追列遺懿。求諸后土。則是誄亦納諸壙中。誄銘亦可謂之誄。故元鄭師山爲洪頤誄云。其門人俞溥狀其言行。俾爲之誄。以誌其葬。振方按。周禮太史遺之曰讀誄。疏曰。遺謂大遺。奠故以遺。謂祖宗之奠。人之道終於此者。以未葬以前。孝子不忍異視於生前。仍以生禮事之。至葬送形而往。迎魄而歸。則以鬼事之。故旣葬之後。

當稱謚。乃誄生時之行而讀之。此經云誄卽累也。據此。則誄所以事幽。原與誌銘一例。謂誌銘爲誄亦無害。又曾子問云。惟天子稱天以誄之。又云。賤不誄貴。幼不誄長。禮也。今人有卑幼爲尊長作誄者。固失之非禮。卽其爲親友之輩行作者。亦非也。故只可爲哀辭。而不可名哀誄。

行狀

要例曰。衛公叔文子卒。其子請謚於君曰。日月有時。將葬矣。請所以易其名者。請謚之詞。此今世行狀之始也。唐宋以來。官雖不應謚。亦有行狀。此求誌銘者也。二者體應小異。請謚之狀。須將謚法配之。可不書姻婣子姓。求誌則必書。又有行述。行略。行實。與狀名異實同。皆求誌用。

附錄李習之百官行狀。奏凡人之事迹。非大善大惡。則衆人無由知也。故舊例皆訪問於人。取行狀以爲依据。今之作行狀者。非其門生。卽其故吏。莫不虛加仁義禮智。妄言忠肅惠和。或言盛德大業。遠而愈光。或云正道直言。沒而不朽。曾不能直敘其事。故善惡混然不可明。至如許敬宗、李義府、李林甫、國之奸臣也。其使門生故吏作行狀。既不指其實事。虛稱道德。忠信以加之。可以移於房魏。裴徐矣。此不惟其居心不實。苟欲虛美於受恩之地耳。由是事失其本。文害於理。而行狀不足以取信。若使指事書實。不飾虛言。則必有人知其真僞。不然者。縱使門生故吏言之。亦不可謬作德善之事而加之矣。今請作行狀者。不要虛說仁義禮智。忠肅惠和。盛德大業。正言直道。無穢簡冊。不可取。

信。但指事說實。直載其詞。則善惡功迹。皆據事足以自見矣。假令傳魏徵。但記其諫諍之辭。自足以爲正直矣。如傳段秀實。但記其倒用司農印。以追逆兵。又以象笏擊朱泚。自足以爲忠烈矣。今之爲行狀者。都不指其事。率以虛辭稱之。故無魏徵之諫諍。而加之以忠直。無秀實之義勇。而加之以忠烈者。皆是也。其何足以爲據。

附行狀式。

惟昌黎許公行狀爲如式。故舉以爲法。

故金紫光祿大夫。檢校尚書左僕射。同中書門下平章事。兼汴州刺史。充宣武軍節度副大使。知節度事。管內支度營田。汴宋毫穎等州觀察處置等使。上柱國。隴西郡開國公。贈太傅董公行狀。

曾祖仁琬。皇任梁州博士。

祖大禮。皇贈左散騎常侍。

父伯良。皇贈尚書左僕射。

公諱晉。字混成。河中虞鄉萬歲里人。階累升云云。勳累升云云。爵累升云云。娶河南張氏夫人。後娶京兆韋氏夫人。先公終。四子某某。請具歷官行事狀。伏請牒考功。並牒太常。議所諡。牒史館。請垂編錄。謹狀。

貞元十五年五月十八日。故吏前汴宋毫穎等州觀察推官。將事郎。祕書省校書郎。韓愈狀。

唐故贈絳州刺史馬府君行狀。董狀請證此狀求文。

略云。予既通家。詳聞其世系事業。今葬有期日。從少府請綴其大者爲行狀。託立言之君子。而圖其不朽焉。

賜碑名號

金石例曰。唐太宗自撰魏元成碑。德宗亦撰段秀實碑。皇祐中。王融守河中還。乃以明皇所題裴耀卿額上之。仁宗遂御篆沂公碑曰旌賢。則賜碑名號。應自此始。

金石文訂始

金石文

金石例曰。事祖廣記引蔡邕云。黃帝有金石之名。王子年拾遺記曰。黃帝以神金鑄器。皆有銘題。凡所造建。皆記其年時。此銘之起也。周禮凡有功者。銘書於王之太常。春秋左傳曰。季武子以所得於齊之兵。作林鍾。而銘魯功焉。

金石訂例卷二

文章貴先合體。體者例也。昌黎文起八代之衰。義正詞嚴。金石例一宗其法。但例之緣起可否。有不盡於昌黎者。振方故參以梨洲先生要例。所引諸大家。并搜閱諸文集之可採。以爲依據者。實之。閒又附以己見。標別其正變。與其是非。以列之於左。

金石訂例上二十六條

書先代例

振方按。書先代世次。有自顯著起者。有自學業德行。及遷徙流寓起者。有單書遠祖。而不及近祖者。有自遠祖遞推至祖父者。有單敘三代者。有至五六代者。有單書祖父或父者。有并推及得姓之祖者。有不書三代者。法皆不拘其稱名。則自有別。昌黎侍御史李君誌曰。十一世祖子厚。誌曰。七世祖司業。竇公誌曰。六代祖刺史薛公。誌曰。其上祖大約自高以上。當依世數稱之。蔡邕祖攜碑。攜字敘叔。曾祖父勳。攜生稜。稜生邕。邕至勳連身六代。故後漢邕傳。稱勳爲六世祖。唐穆員爲其父誌。高祖上一代。則稱五代祖。而高則曰高祖。陳子昂誌父墓云。高祖方慶。柳州父神道碑云。六代祖慶。五代祖旦。高祖楷。蘇子美父誌亦然。曾則曰曾祖。祖則曰祖。若昌黎房少尹誌是也。曾曰曾大父。祖曰大父。父曰父。崔諤事

誌是也。曾曰：人王父，祖曰王父。房公誌是也。曾曰：王大父，庾承宣田布碑是也。至范育作呂叔和誌，則稱曾爲皇考，祖爲王考，父爲考。按王制曰：考廟，曰王考廟，曰皇考廟，則皇考乃曾祖之稱。屈原稱朕皇考曰伯庸，晉司馬機爲燕王告禰廟文，稱敢昭告于皇考清惠亭侯，是又以皇考爲父沒之通稱。至魏相謂漢宣帝父宜稱尊號爲皇考，光武亦于南頓君稱皇考廟，是又以加皇號爲事考之尊稱。顧夢縻又謂宋時羣下得概稱皇考，未嘗有明禁。永樂六年十二月戊戌，賜秦王尙炳書，遂謂皇考皇妣，是朝廷尊稱。藩國豈得僭用？故至今無敢僭之者。又按占金石例，不敢稱皇字，隲字，由此觀之，禮時爲大，宜次之。凡書祖考名號者，直稱爲高曾祖考，或易以大父，曾大父等類可耳。

書宗族嫗黨例

按凡書宗族嫗黨，非其顯著及有關係者，必因類及之。昌黎作子厚誌曰：曾伯祖奭爲唐宰相，什少尹誌曰：公之母兄太常博士太原王公碑曰：莊憲皇太后之弟。今天子之舅，此皆以顯著及者。盧處士誌曰：余于處士妹壻也。子厚誌曰：舅弟盧遵，薛助教誌曰：命君後兄。據王公誌及韓侍中誌曰：自外高王父及外王父，又曰：少依舅氏讀書，習騎射，此皆有關係及之者。孔公幾誌曰：公之昆季五人，載戰戰，公于次爲第二，此因類及也。餘可類推。至書叔伯，有曰世父叔父，書父弟，有曰從父兄弟者，按儀禮喪服篇有族尊祖父者，尊祖之兄弟也。其子爲族祖父，其孫爲族父，其曾孫爲族兄弟，有從祖祖父

者。祖父之兄弟也。其子爲從祖父。其孫爲從祖兄弟。有世父叔父者。父之兄弟也。其子爲從父兄弟。故書叔伯母。亦曰世母叔母。其用自當有別。

書妻不書妻例

要例曰。周隋碑誌。多不書子姓及配。其時夫婦各自爲誌。故不書。至合葬則必書。如庾子山所作段永司馬裔柳霞侯莫道生諸碑是也。振方按。李昌道作李千戶碑。其開不書千戶之妻某氏。只寫子幾人。其妻怒。曹元野添上說知。昌道言不可書。爲婦人未終。如何敢書婦人。先輩所傳。其筆墨之嚴如此。自唐以後。則無不書妻者。雖閒有之。如柳州之張中散誌。歐陽之石守道誌之類。皆不書妻某氏。然皆非定例。

書妻祖父例

振方按。妻之祖父。古不得書。昌黎獨孤府君誌。則以妻父之顯著。清河張公誌。則以妻之孝順。祇修。故爲詳所自出。卽如左司馬李公誌。校理石君誌。並及妻之曾伯祖叔祖。雖由顯貴。然皆不得爲正例。今更不論其人之是否。且并妻之兄弟族姪牽連而書。爲可笑已。有志於古者。宜知所擇。

書子姓例

振方按。古碑誌無書子姓之例。嘗考周隋之世。有單書嗣子者。如庾子山諸碑。司馬裔書世子侃。長孫

儉書墩等兄弟。卽唐權文公爲伊愼碑。亦僅書家嗣。餘書息男十六人。列書子姓。意卽起於唐也。當時如昌黎集。猶有書而不名者。馬少駭誌曰。有男八人。崔誼事誌曰。有子二人。薛助教誌曰。凡產四男五女。皆不名者也。今則天殤穉弱更無不名矣。可不必從。

不書子婦例

要例曰。女子重所歸。故壻多書。子婦例不書。故楊炯撰曹通碑。載子婦一人。以其倍窳于壻也。裴杭撰田承嗣碑。載子婦二人。以其爲宮主也。而宋之黃裳撰夫人王氏誌。楊慈湖撰施元質誌。方大琮撰其父誌。又李景說誌。則皆書子婦。此外諸家文集亦不多見。至元而古法蕩然。如閻復元明善等作碑誌。無不書子婦矣。擬方按。今更推及子婦之祖父兄弟可不從。

子女不分書所出例

擬方按。古例子女皆統於父。雖異母而不必分書所出。要例引權文公楊綰諸人所撰碑誌以證之。細按權文公撰李巽誌。三夫人四子。不言某屬某氏。楊綰作汾陽夫人碑。六子八女。俱書夫人下。宋歐陽公撰蘇子美誌。先娶鄭氏。後娶杜氏。三子。梅聖俞誌初娶謝氏。再娶刁氏。子男五人。女二人。王荆公撰李宗辨誌。男十五人。女十九人。俱書夫人季氏下。要例又云。婦無別誌。卽附見夫誌之內者。前後夫人不妨分屬子女。此亦變通之說。非古不足泥。而特以風尙相沿。久不可革。雖爲變例。固無大干礙。則亦

不妨從之耳。若有意法古，不可不知也。

婦人誌或書子女或不書子女例

振方按：婦人本不應書子女。自例書後，而亦有書有不書者，以出與非所出故也。王荊公爲曾南豐父誌，子男六人，畢輩卒，宰布，肇女九人，其爲夫人李氏誌，則又云子男三輩，卒女一。觀此，概可知矣。妾不書例

振方按：婢妾之書，古亦無此例。其法應壞於元末時。觀昌黎廬陵荆公等集，俱無此法。試舉一二以推其餘。如昌黎所撰李邢誌，夫人博陵崔氏，七男三女。崔氏所出，只淑一人。餘六子皆非也。皆不書其母。李惟簡誌，夫人崔氏，公有四子，元立，元本，崔氏出。餘二子皆非也。皆不書其母。鄭君誌，初娶章寧女，生二女一男，後娶李則女，生一女二男。其餘男二人，女四人，其餘者，婢妾所出，故不書其母也。子厚誌，初娶楊憑女，先十七年卒，無子不書。再娶子蓋微出，故不書也。柳州所撰張君誌，書子某，母曰雷姬，已爲變例。然猶實書其氏，未嘗加以妾之名也。他如李定母仇氏，王文公爲李簡誌，書定於正室浩氏之下，而不及仇氏，皆古法也。故蒼崖先生金石例，並不載此條。其後如姚牧菴、蘇天爵、劉敏中、李謙等集，或書妾，或書側室，或書如夫人，無不相次而書，並分屬子女於其下。至宋景濂，猶仍其故習，作方愚菴，或版文，而別其名曰少房。迄今沿以爲常，不足法也。

書孫曾例

振方按孫曾之屬非有關係例不得書。稽古碑誌皆如此也。書孫之例疑起於宋孫一書。迄今曾元皆書。梨洲謂似履歷而非履歷。似世系而非世系。正爲此也。觀昌黎柳州等碑誌。楚無書及孫者。孫邀爲杜義寬碑。書孫因其表墓也。權文公爲王端碑。書孫以其葬祖也。白樂天爲崔孚碑。書孫以其求文也。張曲江爲呂處真碑。書其孫女爲李仁瞻碑。書孫李迴秀爲裴希惇碑。書孫皆以其立碑故也。從未有無關係而書者。迨宋則習爲故常。八家若歐陽公作蘇明允誌。南豐作錢純老誌。東坡作溫公狀。則皆書孫。子固作沈率府誌。并書曾孫。東坡作范蜀公誌。并書曾孫女。其他又何論焉。

書承重孫曾例

振方按長子死則長孫應主宗祀。例必書曾孫亦然。

書壻及孫壻例

要例曰壻之書蓋古有之。見於昌黎集中者。王觀察誌。長女壻。次女壻。苗夫人誌。其季女壻韓愈爲之誌。王大理誌。長女嫁亳州永城尉姚挺。董府君誌。長女嫁吳郡陸暢。孔左丞誌。長嫁中書舍人平陽路隋之類是也。壻之得載碑誌。凡他集皆然。若書孫壻。則唐以前從未有者。故權文公作王光謙碑。列之碑陰。與先友一例。宋元以後。孫壻無不入碑誌矣。若虞伯生作董文用伏孫女十人適某某。馬石田

撰劉伯石誌孫女四人一適某一適某之類是也。今并曾孫增無不書變例也。

不宜書增祖父例

振方按女重所歸書增其正例也不當及其祖父古碑誌皆無之如要例引元明善所撰袁夫人史氏誌書長女適宋相史莊肅公嵩之孫似伯次女適工部尚書徐天任之孫昌期次適資政殿大學士史巖之之孫益伯雖因顯宦著名已爲變例他如蘇天爵撰袁文清誌女四人其二人適觀文殿大學士趙某孫由錫故相史忠定公元孫公份其二人適同知袁州路總管庫趙孟貫處州儒學錄余應矩二書祖父二不書者則以著名不著名故然已爲陋習乃今世并不論賈否一概書之非古法也

書外甥例

振方按書外孫重根枝也昌黎撰李司馬誌及公之存內外孫十有五人王文公撰仁壽縣太君徐氏誌書甥四十七人餘可類推

書孫不宜分屬例

振方按書孫已爲變例今并各於其孫下係以某子所出不知父在則皆統之於父婦人且不得分屬子姓何況子而反各係以孫竟得據爲己有且出之云者因母姓而起義也按爾雅謂姊妹之子爲出公羊傳曰蓋舅出以酈世子巫與魯襄公俱是宮外甥同所自出故云然也今以出屬之於父不通極

矣。然則凡書孫者，只可統云孫男幾人。

書母例

振方按：書母之例，有從父牽連書者。昌黎集鄭庫部誌：父娶河南獨孤氏女。韓侍中碑：公之父娶鄉邑劉氏女。李侍御史誌：父娶陳留太守薛江童女是也。有從子牽連書者。昌黎集張府君誌：母曰太原縣君李少尹誌：母曰夫人燉煌張氏。上太原誌：公先妣渤海李氏是也。法皆不拘。

書二母例

金石例曰：昌黎集馬刺史狀：初司徒公娶河南元氏，封潁川郡夫人，贈許國夫人。許國薨，少府始孩，顧託以其姪爲繼室。爲陳國夫人。陳國無子，愛君與少府如己生，其薨也，君與少府喪之，猶實生已親，負土封其墓。

書子女年歲例

振方按：書子女年歲，以孤弱故也。昌黎撰獨孤府君誌：次曰天官，始十歲。子厚誌：長曰周六，始四歲。季曰周七，子厚卒乃生，皆此例。否則便不當書。

承繼子應書例

金石例曰：凡人無後，以兄弟子爲子者，例應書明，不得概曰子某。昌黎撰韓宏神道碑：子男二人，長曰

肅元某官。次曰公武某官。肅元早死。公之將薨。公武暴病先卒。公哀傷之。月餘。遂薨。無子。以公武子孫紹宗爲主後。薛河東誌。父曰璠。尙書禮部侍郎。命君後兄璵。自給事至君後。再絕。皆有名。遺言曰。以公儀之子。己已後我。

書妻變女變例

振方按。妻變女變。本不應書。古亦有書之者。變例也。要例云。張景妻唐氏。再適。宋祁載之。陳了齋爲太令人黃氏誌曰。先適大中大夫孫公諱迪。次適中奉大夫游公諱潛。書子曰子男三人。謬爲孫氏出。向例所無也。文章家酌用之。

誌銘書法大要例

要例曰。誌銘書法大要。曰諱。曰字。曰姓氏。曰鄉邑。曰族出。曰治行。曰履歷。曰卒日。曰壽年。曰妻。曰子。曰葬日。曰葬地。大要不外此十餘條。振方按。亦有例所有而不書。例所無而書之者。各以其故爲變例也。

書合葬例

振方按。婦人從夫。此通義也。誌合葬者。自唐迄元。皆無夫婦同列之例。其題只書某官某公墓誌銘。或墓表。未有書暨配某氏者。如張說爲蕭灌碑。其妻章氏出事實於內。題則不列。楊炯爲王義重碑。其子

師本陪葬亦不列爲標題。梨洲謂此當起於近世是也。

附錄汪氏堯峰與人論墓誌銘篆蓋書云。誌銘草就奉上。直言欲告者。儻卽刻石。則篆蓋及誌文首行宜但云某銜某府君云云。幸勿加暨原配某孀人。此近世無識者所爲。凡唐宋元大家文悉無之。前明成宏以上亦然。卽錢牧齋文亦然也。有刻碑文集可考。古人非略之也。於此固有深義。蓋女子從夫。故祭曰祔食。葬曰祔葬。凡祔食者。惟立男尸而無女尸。故曰同凡。則一尸亦此義也。

書祔葬

要例曰。婦人後夫而死。夫已先葬者。則書祔葬。如權文公所作宏農楊氏。河東縣君柳氏。博陵崔氏皆是也。

婦女碑誌褒揚例

振方按。作婦人碑誌。須是得體。今人褒揚太過。非惟不見賢淑處。反說成一悍婦樣子。甚屬可異。傳曰。婦道無成而有終。書曰。牝雞無晨。古之表婦德者。亦曰內言不出。外言不入。今人反以此爲無能。如其夫與子居官。必曰如何助之愛民。如何助之剔弊。如何助之療荒。凡夫與子政績茂異處。一皆歸於內助。如此類者。十犯八九。輾轉相沿。而不知其非。則猶幸官常之尙肅耳。非然。古來母后尊擅。有垂簾聽政者矣。而茲不且可以出堂理事乎。漢之呂竇。唐之武韋。史册猶譏之。茲不且以爲閭閻宜爾。筆婦

人皆應效之乎。其悖理謬義甚矣。或曰。銘稱美而不稱惡。舍此則婦人何從見美。不知德言容工。婦人美處甚多。僅能一一無錯。則此女已可編入列女傳。書其生平。可爲內則一證。外此如孝舅姑。謹言笑。嚴中饋之類。婦人美處又甚多。何必略此。而反舉夫不合禮者以爲美乎。歐陽公瀟崗阡表。累述太夫人之言。皆父之遺訓。其於夜燭治官書。止有生可求乎一問。未嘗發贊一語也。又曰。其施於外事。吾不敢知。夫知且不得。況於助乎。卽公之贊之者。亦止曰。太夫人守節自誓。居窮自力於衣食。治其家以儉約。其後常不使過之。汝家故貧賤也。吾處之有素矣。此外不聞更置一語也。且卽此數語。而太夫人之節儉。千載如生。雖求之古賢婦。不是過也。而今顧若此。以爲觀美乎。直不足當有識者一笑矣。文章家正不可不辨。

金石訂例卷三

金石訂例下三十一條

婦女誌及行狀例

振方按婦人無爵。凡爲誌銘當以夫爵冠之。子嘗名即以子爵冠之。如某官夫人某氏。某官太夫人某氏是也。至行狀爲請謚而設。以之求文。已與本意相遠。昌黎廬陵東坡三集。銘人之墓最多。而行狀其不過五首。婦人不爲也。然則婦人不爲行狀之意亦明矣。但江淹爲宋太妃周氏行狀。任昉裴野皆有婦人行狀。未知何故。當裁酌焉。

墓表及神道碑例

振方按碑表名異實同。今制三品以上神道碑。四品以下墓表。銘藏幽室。人不可見。表與碑施於墓上。以之示人。故墓表之書子姓。且有銘。不可謂非也。有墓表更不得有墓碣。則墓表之爲圭首方趺無疑。其所以與碑分品級也。作法亦稍有異。梨洲先生曰。墓表表其人之大略。可以傳世。不必細詳行事。墓銘舉例曰。神道碑宜雅而詳。又宋孫和碑解云。班固有泗亭長碑文。蔡邕有郭有道陳太邱碑文。皆有序冠。篇末則係之以銘。未嘗以碑爲文章之名也。迨李翱爲高懸女碑。羅隱爲三叔碑。梅先生碑。則序

與銘皆混而不分集其目亦不曰文而竟曰碑矣。今當如班蔡之作存序與銘通謂之文。若楊燭爲成知禮神道碑其於碑銘之後有係曰若離騷後亂辭者當是別體可以備一格而不可以爲正法。

附錄呂叔簡四禮疑云誌於石示來世也。文其辭篆其姓名合而錮之埋之地中將誰示乎。不若誌諸碣碣者揭也一坏之封無所表識百年之後子孫且不知祖考況在他人故詳其家世以誌之。今用方石二面一面楷書爲文文既工一面篆書爲題篆難辨字字相對埋於墓頭三四尺本註云慮異時人誤爲所動見石而知其姓名庶能掩之謬哉其爲說也石在墓頭發及石則見棺也半矣。南石內向鐵束誰復從容爲汝鉗鎚卽或開之豈皆通文辨篆人耶卽知其姓名死者之德果能致開者之重掩否卽爲掩之能肯復束此石否能必此墓勿再動否此說大可笑也不如題姓氏於碣面詳家世於碣陰有功德者表諸神道使有目者皆得見之免致誤動之尤愈乎程大中誌石砌於壁間有何不可。

附錄朱氏軾云禮經無墓誌惟衛靈公卜葬沙邱掘數仞得石洗視有銘漢夏侯嬰送葬東都門外掘地得石櫛有銘或云古壙中志石也然滄桑變易安知非卽墓左碑耶漢以窆石爲勒銘之具蔡邕作郭林宗碑文趙岐勒石墓側自誌生平此碑文所由始也宋人文集有表志墓表表表而著之也欲示不忘則志不如表至墓前立碣孔子題延陵之墓始也今無論貴賤鐫石曰某人之墓旁註

生卒葬年月日。並子孫名暨之墓前。數傳字跡模糊。則重鐫之。愈於銘表遠矣。

擬方按。前二說皆非也。不知銘表義原有別。銘以誌諸幽。表以誌諸顯。本註慮異時云云。非不見及此也。但用表則風霜雨露易爲剝蝕。其壽約止百年。爲子孫者能表彰先德。模糊而重鐫者有幾。且後世多忌諱。無故而重鐫之。往往以爲不祥。卽有賢子孫知義理者。不爲所拘。能必通俗之皆賢。不爲肘制耶。若埋諸地。而又字面相向。不至損壞。無風霜雨雪侵削之。雖千萬年可不毀。墓之有志。正爲久遠計也。本註慮異時云云。原不得泥看。蓋爲千百世後。陵谷遷變。無心而得者。此仁人君子一時惻隱。未有不爲之掩。此準情度理之言也。且棺至百餘年。亦就毀腐。鐵束亦僅如此。而此百餘年內。墳塚未平。表石尙在。子孫之守尙嚴。誰復敢發之者。如叔簡之疑。謂見棺已半。誰復從容與汝鋪鎚。則是棺未壞。鐵未朽。只是百餘年內事。其昧於託義遠矣。至朱氏謂滄桑變易。安知非卽墓左碑等語。其謬尤甚。無論表制與銘制大小不同。況古無墓表。安得變易而入地中。其說之不可信者也。至近世不用石刻納墓中。而但作文傳送。以佐金錢輿馬之出入。則又習之甚陋者矣。

婦女亦有神道碑例

要例曰。張說有和麗息國長公主神道碑。李華有東光縣主神道碑。楊綰有汾陽夫人神道碑。故婦女亦有之。

子孫爲祖父行述例

要例曰子孫爲祖父行述稱謂當卽以祖父爲主稱父之父曰王父王父稱爲曾王父曾稱爲高王父非也穆員作父狀云高祖宏遠此員五人祖也曾祖罔禮此員高祖也祖思恭此員曾祖也父元休此員祖也其歷敘如此未嘗以員之自稱伐之孫逖父銘陳子昂父誌無不如是

子孫爲祖父碑誌例

振方按碑誌皆倩人爲之此通例也而子孫亦可爲之者先儒往往有之略問禮以爲不暇及是也白誌則宜稱府君矣而問禮爲其父誌則曰某官某公者欲易見也此蓋祖銘旌之例銘旌書某公欲使人知爲某之祔則誌石之所以立亦欲使人知某之墓耳雖以子孫爲之其稱公何傷乎且公者原子孫自有之稱也今人言及其祖父往往稱家某公如祖父爲宮保則曰宮保公爲尙書則曰尙書公之類無官亦係其字爲某公可知公者非必他人始得稱之也口之可稱謂必不可筆之誌非也

碑誌繁簡宜各當例

金石例曰誌藏壙中宜簡而要墓表表其人之行事可傳者宜稍詳神道碑以記其人之事跡宜更詳行狀所以備史院採錄或求人碑誌宜極詳惟昌黎繁簡得體觀太原王公碑與其誌劉統軍碑誌可見若范文正公爲种世衡誌數千言韓維爲程明道誌亦數千言東坡爲范蜀公誌五千餘言則稍溢

矣。

書職名例

金石例曰。有出身必書。若昌黎苗參軍崔評事等誌是也。內職必書。若房少尹裴少尹等誌是也。除授必書。若薛刺史誌是也。但書必以實。

題不書官與姓例

振方按。碑誌標題。所以揭文之領。書官書姓正例也。然昌黎之施先生。柳州之樊紹述。及貞曜先生等誌。廬陵之張子野。尹師魯誌。皆以其名之重。而不書官。書官輕之也。李文公撰處士侯君誌。又以所歷三縣皆攝。故仍書處士。而不書官。書官掩之也。王荊公撰王深甫誌。又以仕非其志。而不書官。書官累之也。廬陵撰徂徠先生誌。則以魯人所尊。因卽其所居之山稱之。而不書官。書官辱之也。并不書姓。而僅書先生。以誌其有德也。凡此雖皆出於創。而各以其實。亦不得謂之變也。

不書姓例

振方按。碑誌之不書姓。其例有五。一曰宗室。一曰名門。一曰鉅族。一曰貴戚。一曰顯家。如昌黎之左司馬李公昭。武李公等誌。宗室也。獨孤府君柳子厚等誌。名門也。河南令張君司戶韓府君等誌。鉅族也。刺史董府君劉統軍馬少監等誌。貴戚顯家也。五者之外。有已見於題而不書者。崔評事誌是也。蓋題

爲文之綱。文爲題之目。綱既舉。目自有可略之理。此又不書姓之通例也。然略其姓者。其敍族出尤詳焉。

碑誌必實書例

振方按。碑誌雖曰稱美。但須核實。不得憑空設撰諛詞。使其人之名實相反。曾傳聞先輩爲人壽文。其人本悍愎不軌。武斷鄉曲者。其文云。翁之爲人。不拘小節。不畏強禦。信心而言。遂意而行。雖不失爲稱美。而其人大概可見。此等筆力。惟前輩有之。有志於古者。不可不加意也。

贈封必書例

振方按。贈封官爵榮之也。無論其親之得贈。與其人因子孫而得贈。皆當持筆書之。唐宋來無不然者。試觀昌黎集中劉統軍碑。詳書封爵於敍事前。許國公碑。於題中卽爲標出。陳了齋中奉大夫游公誌。銘序稱居士。而題必書所贈之官。廬陵薛簡肅誌。敍首卽書三代贈官。而未復詳三代妣氏封。陳文惠公誌。於題與序互詳其贈官封爵。王荊公撰贈衛尉李公碑。碑首卽書誥贈之辭。皆兢兢不敢略。卽有變其文而書之者。如尹河南撰宣德郎皮公碑。不曰贈某官。而曰得以某官告其第。祕書丞左君誌。曰追命爲某官。朱子撰吳學士碑。曰有司以某官告其第之類。皆據實直書。今世碑誌於題首卽冠以誥贈等字樣。猶爲古法。又有其人之歷官不甚顯。而贈封顯者。宜於題標出贈某官某公碑誌。而於序中

歷紀其居官事蹟。此例之所必然也。

子女爲僧尼必書例

金石例曰。子女爲僧尼。例必書。昌黎撰廬殷誌。女一人。學浮屠法。不嫁。爲比丘尼云。單君誌。女子三人。其長學浮屠法。爲比丘尼。

碑誌宜直書名字例

振方按。碑誌之作。當直書名字。使其後可考。

書題例

振方按。有官則題某官某人。無官則題某人。有封贈則題封贈某官某人。或稱公。或稱君。或稱府君。或直書字。或書某姓某名。戚族則書稱呼。而係以某府君。平等幼小則書稱呼。并係以字或諱。此古例也。作婦人碑誌。或冠其夫與子之官爵於前。而係以某夫人某氏。及某恭人安人宜人孀人之類。各據其實。今古皆然。王荊公長安縣太君墓表。題不書姓。以兄爲表。無書姓之理也。苟同姓而非親近。則必書。如王深甫誌之類。此猶遵行古法。自宋後則有稱行次者。朱子劉十九府君誌是也。有書其所推之號者。如黃山谷瀘南書老史君誌是也。有書所自號者。如朱子韓溪翁程君誌是也。當日所題如此。或爲親之之辭。或爲重之之辭。各有其故。與昌黎集中施先生。貞曜先生。廬陵集中。徂徠先生之稱。實爲一

例。若柳州集東明張先生誌。題係其居而稱先生。則又不在此例中。以其爲學黃老之常稱也。後世不知。漫相沿習。亦不通甚矣。南豐撰亡妻文柔晁氏誌。冠其字於氏之上。蓋欲彰其妻之賢淑。且以示親暱之意。故云爾。近世婦人不皆有字與諱。閒有之者。爲其碑誌必載之於題。若以爲罕見足紀之事。失其旨矣。至同姓則冠之以家字。此蓋起於明世。元以前未之見也。

稱呼例

要例曰。名位著者稱公。名位雖著。同輩以下稱君。若舊則稱府君。有文名者稱先生。友人則稱字。元姚牧菴稱趙提刑夫人爲楊君。則變例也。又毛稚黃云。男稱公與府君。女稱儒人。似不得加於小輩。若本有封贈。又當別論。呂叔簡云。府君儒人。爵也。生爲庶人。死而爵之可乎。然振方按。今人稱呼假借者甚多。若府君儒人之稱。相沿已久。卽從之亦無大礙。

書年月日例

要例曰。凡生死葬。只書某年某月某日。不書時。

墓碑神道碑例

振方按。柳州葬令曰。五品以上爲碑。降五品爲碣。此碑碣之分。凡言碑者。卽今之神道碑也。以神道二字重於墓。雖有墓與神道之名義無別。故凡碑題書神道。卽不得更書墓字。惟呂黎胡良公墓神道碑。

變例連書以外諸公集俱未之見。

墓誌無銘及有銘無誌例

要例曰。有誌無銘者。序事卽銘也。有銘無誌者。卽以韻語爲敘事也。二者法異實同。蓋所謂誌銘者。迴一篇言之。非以敘事屬誌。韻語屬銘也。如作賦者。未有重曰亂曰。總之是賦。無銘者。猶賦之無重亂者也。古銘中原有無銘有銘二種。季札之喪。孔子銘其墓曰。嗚呼有吳延陵季子之墓。衛孔悝鼎銘云。六月丁亥。公假於太廟。公曰。叔舅。乃祖莊叔。右左成公。公乃命莊叔。隨難於漢陽。卽宮於宗周。奔走無射。啓佑獻公。獻公乃命成叔。纂乃祖服。乃考文叔。典舊者。欲作。率慶士。躬卹衛國。其勤公家。夙夜不懈。民咸曰休哉。公曰。叔舅。余汝銘。若纂乃考服。悝拜稽首曰。對揚以辭之。勒大命書於烝彝鼎。此銘之無韻者也。正考父之鼎銘曰。一命而僇。再命而偃。三命而俯。循牆而走。亦莫敢余侮。罔於是。粥於是。以餽子口。比于銅盤銘曰。左林右泉。後岡前道。萬世之寧。茲焉是保。漢滕公發地得石槨。銘曰。佳城鬱鬱。三千。年見白石。吁嗟滕公居此室。此銘之有韻者也。若墓表神道碑。俱有銘有不銘。

誌銘不妨雜出姓氏等類例

振方按。誌銘之合一。前條論之已詳。故凡姓氏世系鄉邑葬地歷官等事蹟。前輩雜出於銘中。此又一例。非變也。觀昌黎刺史薛公誌。姓氏見銘中。施先生誌。世系鄉邑葬地俱見於銘。而誌則專重其文名。

宋時張宛邱作王仲儒誌。於其歷官爲政序綱。而銘目之。凡此皆是也。如必謂序以序其實事。後作銘以稱美之。亦適見其識之陋。而不知古大家之法有甚備者矣。

書死例

振方按。曰卒。曰終。曰捐館。曰仙逝。曰仙遊。曰長逝。曰謝世。曰棄世。曰捐世。此通例也。曰疾卒。曰病終。曰考終。曰壽終。曰暴病卒。則各以其實。

書葬例

金石例曰。凡勅葬。詔許還葬。自他州反葬。及葬他州。皆宜實書。

書國號例

金石例曰。凡出仕於前代。則稱國號。當代稱某皇帝。及皇上。今上。天子。

名號稱呼例

金石例曰。風俗通云。帝新崩。未定諡。曰大行皇帝。禮記曰。天子死曰崩。諸侯曰薨。大夫曰卒。士曰不祿。庶人曰死。又韓魏公祭式稱名曰。顯曾祖。顯曾祖妣。顯祖。顯祖妣。顯考。顯妣。妻先亡曰顯孀。妻祭夫曰顯辟。穆甫兄弟曰顯穆甫。

時忘字樣例

金石例曰：古金石例曰：不敢稱皇字，隧字。

碑誌文辭各異例

金石例曰：如云千歲之後，陵谷變遷，知其爲良吏之壙，其勿毀焉之類，止施於墓內，不可作碑用。如文詞有可通，則爲誌爲碑俱可，但碑上不言誌字，止曰某官某人墓碑，或墓碣。

銘法例

金石例曰：祭統云：銘稱美而不稱惡。故昌黎云：應銘法，若不應銘法，則不書之矣。以此寓褒貶於其間。然昌黎之於子厚，言少年勇於爲人，不自貴重，李于誌單書服泌藥一事以爲戒。李虛中誌亦書其以水銀爲黃金服之，冀不死。王適志言其謾侯高事，李道古誌言其薦妄人柳泌，皆不掩所短，非截然諛墓者可比。振方按：作碑志者，固當於其人之美處書之，而大干係所在，亦不得一概滅卻也。

風水年月之謬例

振方按：禮書所載：天子諸侯大夫士庶葬有月數，不得逾，是不擇年也。春秋九月丁巳葬定公，雨不克葬。戊午日下昃乃克葬，是不擇日也。鄭葬簡公，司墓之室當路，毀之則朝而窆，不毀則日中而窆。子產不毀，是不擇時也。古之葬者，皆於國都之北，兆域有常處，是不擇地也。今南俗酷信風水，拘牽年月，諺云：江南無大地，只要年月利，以至擇時選日，動經廿年，按向取方，淹遲數載，至遭水火盜賊，遺棄骨殖。

而不願。或年遠棺朽。不堪舉動。則舉火焚之。拾骨置之甕中。又以陰陽忌諱。子孫不肯親蒞其事。一委土工。顛倒任意。有遺殘骨而不之檢者。有并狗彘畜類之骨。一概收拾者。嗚呼。孝子順孫心安之乎。故其謬有不待辨而可知者。

僧碑宜書不宜書例

金石例曰。柳州大明和尚碑陰略云。凡葬大浮屠無竈窆。其用於碑不宜。及秦刻山石。號其功德。亦謂之碑。而其用遂行。然則雖浮屠亦宜也。而宋景文筆記又論僧碑不宜書。振方按。今釋氏之葬。不曰碑銘。而曰塔銘者。蓋猶存不宜用碑之義也。

論僧臘及僧稱公例

要例曰。因話錄云。釋氏結夏。隨其身之輕重。以蠟爲其人。解夏之後。將本身驗於蠟人。輕則爲妄想。耗其氣血。故爲塔銘者。書僧臘若干。世壽若干。今作伏臘之臘。失其義矣。振方按。認臘爲年字之義。悖謬之甚者也。要例又曰。僧之稱公。當以其名。宋景濂塔銘可按也。及今乃以其字。失之矣。文章寧不得因之。

寺碑宜書不宜書例

要例曰。宋景文筆記云。碑者施於墓則下棺。施於廟則繫牲。古人因刻文其上。今佛寺揭大石鏤文。士

大夫皆題曰碑銘何耶。但按儀禮碑在堂下三分庭之一。當碑立宗廟路寢庠序皆有碑。所以識日景。是不特繫牲用也。碑於釋氏無礙名義。

金石訂例卷四

文章之道。變化因心。隨題制法。實非可盡。於訂例因酌取王止仲墓銘舉例之說。爲推例八十一條。附錄金石例所載學文。凡例十三條。皆文章之流派。詳列其目。俾學者有所考焉。

金石推例 八十條

韓昌黎二十條

河南尹杜君誌

詳其世胄。重其族之大也。擬方按。亦通例也。

參軍苗君誌

書季子生卒。紀實也。不以爲例。非嫡長也。

韋觀察誌

詳書兩妻之祖父。兩妻皆先卒。故於此見也。擬方按。變例也。

河南令張君誌

卒不書略也。

馬少監誌

不書字。卒不日。葬不日。不地。不書妻。重在敘其世。故略之也。按方按。非正例也。

太原王公誌

特書母郡氏贈號。榮也。按方按。亦通例也。

鄭庫部誌

書母。因事也。

施先生誌

書先生以文名而已。從諸生之列也。

盧殷誌

題書名。別例也。曰別者。非常例。而亦不得爲變也。

李參軍誌

書世系而不及父。書壽年而卒不日。重在紀其世。著其德。識其葬也。曰壙。曰窆。曰墳。各謹書其實。別例也。

樊紹述誌 貞曜先生誌

專論其文重也。

寶司業誌

詳敘其兄弟所歷官以皆有才名也。振方按別例也。

元君妻韋氏誌

書夫履歷誌婦人之通例也。子女見銘中別例也。

息國夫人誌

不書諱婦人重姓也。題封而不氏。榮其封也。振方按題封不氏創例也。

乳母誌

葬乳母而有誌自昌黎始也。

盧渾誌

題書名適可也。

鄭夫人殯表

殯有表。創例也。表宜文而用銘。變例也。

曹成王碑

碑皆立既葬後。此碑之立。王薨已二十五年。葬時已有誌。故特書其大也。大者。世系名行功業也。權公墓碑

詳書官位爵諡。通例也。

滎陽鄭公碑

不用銘詩。以議論感慨。別例也。

李習之四條

御史丞獨孤公誌

書父諡不書諱。別例也。

傅氏誌

題書其夫。不曰君。而曰氏。變例也。

京兆氏誌

書弗克。祔於夫子族。而依於女子氏之黨。紀實也。

傅公碑

題書官階勳爵甚詳。而序多略。變例也。據方按。題綱而序目。雖變亦可法也。

柳子厚十三條

李御史碑

世系用宗法敘。以有土田也。振方按。變例也。

裴評事誌

三代以昭穆書。變例也。

襄陽承趙君誌

重書其子之協卜而得殯。所以著其孝感也。

筭郭師誌

書其藝於題之端。適可也。

亡友獨孤君墓碣

題書亡友親之也。詳書其友之知名者於後。與先府君表陰先友記同例也。振方按。與碑陰同例變也。

周御史碣

詳書其諫而致死。立石之所宜也。

先太夫人歸祔誌

無銘詩。不忍也。非略也。題書歸附實也。

伯祖妣李夫人誌

既敘其世系族出。又書其夫世系族出。特加詳焉。婦人內夫家。故敘夫姓尤詳也。

叔妣陸夫人誌

書諱又書字。例之備也。不書其夫之諱。通例也。

崔刺史權厝誌

權厝有誌。亦一例也。族出諱字。壽年見銘詩中。變例也。

凌司馬權厝誌

不書壽年族出葬日。以權厝可不書也。

續滎澤尉周君誌

題書續。蓋續崔太傅祐甫之辭。故但敘其終葬之故。與著其終葬之年月日。而他不及也。無銘詩。無所事於銘也。據方按。雖紀實。變例也。

亡婦崔氏蓋石文

蓋石有文。變例也。其爲婦爲妻爲母之道已著於銘。故但敘其自幼。以至於笄爲女之道也。

歐陽公十四條

程文簡公誌

特書三代姓氏封公創例也。振方按。雖創而不失正也。

歐陽員外郎誌

三代皆以廟室書別例也。振方按。不但別例。變例也。不可從也。

杜祁公誌

詳書世系誌盛也。

歐陽職方誌

序末詳書世系以兄子銘叔文故尤詳其家世也。

梅聖俞誌

特書兩母封氏又一例也。振方按。當可也。

王舍人誌

詳敘其子之好學以有成也。

張司錄誌

題下書曰某官天水尹洙撰而序末云渤海歐陽修爲之銘兩人共爲別也與張君改葬碣同按方按雖別而以實可法也

長安郡太君盧氏誌

論五福而夫人之履歷具又一例也

石門監衛將軍夫人李氏誌

不書夫姓以夫爲宗室也

母鄭夫人石櫛銘

石櫛有銘創例也

澠岡阡表

題以地書致其尊也嚴書立表歲月朔日甲子重之也詳書己之助階官月爵號食邑著先德之所致也

王文正公碑

首詳奉勅之辭而後敘次其事賜碑之正例也

陳文惠公誌

書三代爵土階官本贈而不曰贈變例也。

明因大師塔記

無一語及浮屠法正例也。書生年別於爲僧之年也。

尹河南一條。

上柱國王公誌

書葬地曰葬某所不從於先君用卜吉也。此新阡之正例也。銘不以詩而論以望之又一例也。振方按。

曾南豐五條。

李校書誌

敘其先則詳書歷代之顯人敘其後則及曾元之蕃衍侈其盛也。振方按。變例也。

張文仲誌

詳其所以未娶之故而未娶見焉。又一例也。

徐中丞誌

詳所自出見盛衰不可常也。非誇大也。

皆都官誌

書乞銘不曰以狀而曰以茂謚之疏變例也。

吳通判誌

書其父載子之官世行事乞銘變例也。振方按紀實也可從也。

王荆公七條。

葛尚書誌

壽年以甲子書變例也。敍履歷既總舉所閱之官敍政事又各舉所居之職同柳州叔父墓版例也。

王逢原誌

書子而曰妻方娠紀實也。

轉運使李君誌

誌葬地而曰君所自爲壽藏紀實也。

楚國太夫人陳氏誌

書子女不係夫人曰公子公女公培從夫正例也。

右千牛衛將軍仲馬故妻武氏誌

題書某人故妻創例也。敘書某官某人之妻故某封某氏。題書某官某人故妻某氏。一以故係封。一以故係妻。義雖不殊。自成兩例也。振方按。例之微者也。

金華縣君吳氏誌

書其夫之壽年葬日。又一例也。

長安縣太君葛表

書十四而嫁。五十一而老。五十六而卒。書老創例也。

蘇東坡二條

張文定誌

書三代妣。不以妣書。而曰某妻。又一例也。書女曰嫁。而曰復歸。紀實也。

王子立誌

書子曰有遺腹裔。紀實也。

朱夫子三條

潘氏婦誌

書潘氏婦。雖夫請銘而主於舅也。創例也。振方按。雖創而正可從也。

篤行趙君彥遠碣

題揭其德以表之。創例也。撰文制題。向出一手。此曰福國陳公。大書其碣之首曰。皇宋篤行趙君彥遠之墓。而子某使人奉狀請銘。而刻諸下方。亦變例也。

翁司農碣

既書調某官。以母喪不赴。又書以少母喪去官。所謂少母。蓋其生母也。紀實也。振方按。書少母。變例也。

陳后山二條

魏嘉州銘

詳書其世胄與遷徙之次。重其族之大也。特書生母。以有兄也。

陳仲父銘

書妻曰某氏不終。故葬不祔。不終。離婚也。創例也。

黃山谷二條

瀘南書老史君誌

書三代。而二代皆書其所自號。創例也。振方按。變例也。

黃氏二室誌

題書二室變例也。振方按：二室同誌題標明之，雖變而於義爲是也，可從也。
陳了齋三條。

李景溫誌

書爲其子擇娶，非正書也。

鄒侍郎埋銘

埋銘而無銘，又一例也。振方按：序文卽銘，於訂例已詳言之也。

豐尙書墓識

題書墓識創例也。振方按：與上條同。

晁濟北一條。

闕氏誌

書邑里而無世系，不書嫁而書入，不書祔而書近夫之故兆，蓋微者也。爲其子而銘也，變例也。振方按：例雖變而義當然也。

呂東萊二條。

林安之誌

敘其師爲之請銘。又一例也。

金華汪仲儀母王氏誌

題書某郡某人母某氏。又一例也。

附錄潘蒼崖先生學文凡例十三條。皆刪訂原文。不參鄙見。

制式

門下云云。某官某云云。於戲云云。可授某官。主者施行。制始於秦。漢因之。下書有四。次曰制。唐王有七。二曰制。學士初入院。試制書批答三篇。此試制之始。體用四六。以便宣讀。真西山曰。貴典雅。體用字不可深僻。造句不可尖新。三處最要用工。一曰破題。制頭四句。用四六一聯。不可用七字。要包盡題目而不粗露。若包不盡。當擇體面重者說。其餘於散語中見之。二曰敘新除處。或四句。或六句。欲精當。具官名。須尋替換字面。三曰戒辭。於戲而下也。須有叮嚀語。誠意。或用古事。或用古語。要精切。觀元厚之蘇東坡等制可見。

誥式

勅云云。具某官云云。可特授某官。二人以上同制。則於調前生列除官人。具銜。可依前件。侍從以上用姓。可特授某官。上納下便云。具官某等。勅。具官某云。誥。告也。其始由湯誥。周官大祝六辭。三曰誥。士師五戒。二曰誥。漢元符六年。立三子爲王。初

作誥香山集翰林曰制誥中書曰制誥蓋內外命書之別宋朝西掖初除試誥在命題亦曰制唐錢

詔式

勅門下或云勅等故茲詔示獎諭誠撫想宜知悉

詔起於秦漢下書三曰詔書唐張昌齡召見試息兵詔此試詔之始呂東萊曰或散文或四六皆可四六語須渾全不得新奇致失大體散文當以漢詔爲根本西漢詔中如吏獨安取此皆秉德以喻之類當勾出規仿之周益公曰答王子詔用卿字非前輩知體不能其他或汝或王或公皆當有別

表式

賀表

臣某言或某等言恭略恭聞守臣用某月日云云者祥瑞表云伏睹太史局奏云云者臣某懼忭懼忭頓首頓首

首竊以云云恭惟皇帝陛下云云臣云云臣無任瞻天望聖激切屏營之至謹奉表稱賀以聞臣某情

忭懼忭頓首頓首謹言

謝表

臣某言伏蒙聖恩云云者謝除授伏奉告命臣某官職者臣某惶懼惶懼頓首頓首竊以云云此後臣云云茲蓋榮遇

皇帝陛下云云臣云云臣無任感天荷聖激切屏營之至謹奉表稱謝以聞進謝恩詩云謹格齊沐攢成謝恩詩隨表上進以聞

臣某惶懼惶懼頓首頓首上言

進書進貢陳情表

臣某言云云臣某惶懼惶懼頓首頓首竊以云云進國史等書恭恭惟皇帝陛下云云臣云云臣無任

瞻天望聖激切屏營之至陳情表則云無任祈天俟命云云所有某書若干卷謹隨表上進以聞進詩云恭賀御製詩

云云陳情表云謹奉表陳情以聞臣某惶懼惶懼頓首頓首謹言代宰相以下陳情表如請正殿之類中謝或云竊以

云云表標也明也標著事序使之明白也始於秦唐顯慶四年始以此試進士法當簡潔精緻爲先

露布式

尙書兵部臣某言臣聞云云恭惟皇帝陛下云云臣等云云臣無任慶快激切屏營之至謹遣或云某

官奉露布以聞露布始於漢時但非獻捷所用後魏乃書帛建於漆竿上名爲露布欲天下聞知克

捷之功也西山云貴奮發雄壯少粗無害呂東萊曰頭四句後再二句散語須使用前代兩事其式如

後

尙書兵部臣某等言臣聞

等號皇帝陛下

化此。

賊獨。

說攻討次序。

說擒賊得地。斯皆歸善臣對語作結。

檄式

某年某月某日某官某告某處。或云移某郡。蓋開說云云。說招頻討滿意。惟爾某處將士。歸及略說。賊之罪狀。幕府受命討賊。甲兵之盛。鼓當時。主上則有過人大度之意。開其自新之路。再以歸附。檄到如章。書不盡意。形勢賊將欲滅。須自歸意。或云茲言不欺。其聽所感。或云茲言不爽。其聽毋違。故檄委曲。檄到其善詳所處。如律令。或云檄到言告。咸使聞知。或云幸加三思。詳擇利害。或云文書千里。檄行。或云檄到急下。縣道使咸喻陛下意。毋忽。或云廣宣恩信。班揚符賞。檄軍書也。戰國張儀爲檄告楚。名始見。漢有羽檄。示速也。唐以後多用四六。不布告天下云云。如律令。貴鋪陳利害。感動人心。

箴式

序云云。箴云云。敢告。或云如虞人箴。末云。箴者諫誨之辭。始於周秦以上。漢楊雄擬作十二州二十五人司原政告。饒夫。箴者諫誨之辭。始於周秦以上。漢楊雄擬作十二州二十五官箴。後之作者。咸依倣焉。唐進士亦或試箴。須用官箴王闕之意。各以其官所掌而爲辭。真西山曰。箴乃規諷之文。須有警戒之意。

銘式

序云銘韻謂古人凡器皿廬室皆有銘。不特碑誌。如劍閣塗山之類。始於黃帝。唐崔渙還調吏部侍郎。試彝鼎銘。建中元與中。始以此試進士。

記式

記者。序事之文。真西山曰。禹貢武成金縢顧命等篇似之。至唐獨孤及。有風后八陣圖記。後擬題倣之。其式如喜雨亭記。亭以雨名。誌喜也。文宣王廟碑。仲尼之道與王化遠邇之類。起手體製也。發運記中一節之類。中閒鋪敘體製也。萬古亭記。附零陵故事之類。末後體製也。總之記序須簡重嚴整。忌堆垛窒塞。須清新華潤。忌浮靡纖麗。

贊式

序云贊云贊者贊美贊述之詞。班史以論爲贊。范曄易以韻語。唐建中三年。試進士以箴論贊表代詩賦。此試贊之始。真西山曰。贊頌皆韻語。體式相似。然頌比於贊。尤貴瞻麗宏肆。用字造語均忌靡俗。

頌式

序云頌曰頌始於黃帝。隋杜元正舉秀才。擬聖主得賢臣頌。唐開元十一年。試進士。體有通篇。

一韻者。有四句換韻者。文心雕龍曰。取鎔經義。自錄偉詞。

序式

呂東萊曰。作記敘者。要起手省力。且就題說起。大抵序以善敘事理爲上。如後世贈送讌集等序。隨事以敘其實。古人制作。其體式可見矣。

跋式

古人跋語不多見。至宋始盛。跋者隨題以贊語於後也。或前有序引。當撥其有關大體者。立論以表章之。要明白簡嚴。不可隨人窠臼。

節錄金石例所載作文法度十八條

黃氏日抄。韓文公與馮宿論文。謂稱意者人以爲怪。下筆令人慚。則人以爲好。古文真何用。於今以俟知者知耳。愚嘗嘆息而自警曰。人誰不講孔孟之學。至遇事則往往而遺其訓。人誰不讀韓歐之文。至執筆則往往而非其體。人莫不飲食。鮮能知味。不心誠求之。是誠無益哉。答劉正夫書。譬之百物。朝夕所見者。人皆不注視。及其異者。則衆觀之。

歐陽公文集序云。歐陽子之學。推韓愈孟子。以達於孔氏者。禮樂仁義之實。以合於大道。其言簡而明。信而通。引物連類。析之於至理。以服人心。故天下翕然師尊之。且歐陽子出。爭自濯磨。以通經學。

古爲高。以救時行道爲賢。以犯顏納諫爲忠。

蘇子瞻曰。凡人作文。須是筆頭上。挽得起數百鈞。又曰。凡作文如行雲流水。初無定質。但當行乎所當行。止乎所當止。文理自然。情態橫生。

李漢老曰。爲文之法。有筆力。有筆路。筆力到二十歲便定。後來長進。只就上面添得些子。筆路則常拈弄時轉開拓。不拈弄便荒廢。

杜牧之曰。文以意爲主。氣爲輔。詞采爲兵衛。

西山先生問傅公景仁以作文之法。傅公曰。長袖善舞。多財善賈。子歸取古人書。熟讀而精研之。蔚乎其春榮。薰乎其蘭馥。有日矣。

野處洪公曰。文章有淵源。有機杼。有關鍵。有本根。學者當如老農然。日而溉。中而耘。深耕而熟耨之。吾文唐矣。不兩漢若乎。漢矣。不三代若乎。欲然自視。未能參於柳州吏部之奧。則日引月長。不至不止也。

朱文公曰。作文自有穩字。古之能者。總用使用着了。宋景文亦云。人之屬文。自有穩當字。第初思之。未至也。

李德裕文箴曰。文之爲物。自然靈氣。忽恍而來。不思而至。杼軸得之。澹而無味。珍刻藻繪。彌不足貴。

如彼璞玉磨礱成器。奢者爲之。錯以金翠。美質既凋。良寶斯棄。

后山攬所作。謁南豐。因留款語。適作一文字事多。因託后山爲之。成數百言。南豐曰。大略也好。只是冗字多。后山請改竄。南豐取筆抹數處。每處一兩行。凡削去一二百字。后山讀之。則其意尤全。因嘆服。遂以爲法。

文心雕龍曰。風骨乏采。則鶻集翰林。采乏風骨。則雉竄文囿。若藻耀而高翔。固文章鳴鳳也。鎔冶經典之範。翔集子史之術。洞曉情變。曲昭文體。然後能學甲精意。雕畫奇辭。才有天資。學謹始習。斷姿染絲。功在初化。器成綵定。難可翻移。魯文昭曰。文才出於天分。可書學問之半。情者文之經。辭者理之緯。善爲文者。富於萬篇。貧於一字。一字非少。相避難也。

王景文曰。文章根本。皆在六經。非惟義理也。而機杼物采。規模制度。無不備具。張安國出考古圖。其品百二十有八。曰是當爲記。於經乎何取。景文曰。宜用顧命。游盧山記事。將褻所歷序之。曰何取。景文曰。當用禹貢。

敘事法。禹貢顧命考工記。其次左傳史記西漢書。名物當類編。事面當考究。句法求之檀弓。則音節響亮。言語絢麗。

銘詞贊頌。不似風雅則俚。

余教人作文。先要令其解經。蓋以所說之書。使之演文。既是熟於義理。就其中抑揚。以得作文之法。此是求速化之法。全章既能解釋。則作疑意設疑以問之。以觀其見識。若能因所問得其旨意。則心地已開。見識已到。然後斷史以觀其處事。如此則作詩作文無不通矣。

梨洲先生論文管見八條

昌黎陳言之務去。所謂陳言者。每一題必有庸人思路共集之處。纏繞筆端。剝去一層。方有至理名言。猶如玉在璞中。鑿開頑璞。方始見玉。不可認璞爲玉也。不知者求之字句之間。則必如曹成王碑。乃謂之去陳言。豈文從字順者。爲昌黎之不能去乎。

言之不文。行之不遠。今人所習大概世俗之調。無異吏胥之案牘。旗亭之日歷。卽有議論敘事。敝車羈馬。終非鹵簿中物。學文者。須熟讀三史八家。將平日一副家儘。盡行籍沒。重新積聚。竹頭木屑。常談委事。無不有來歷。而後方可下筆。顧儉父以世俗常見者爲清真。反視此爲脂粉。亦可笑也。作文雖不貴模仿。然要使古今體式。無不備於胸中。始不爲大題目所壓倒。有如女紅之花樣。成都之錦。自與三村之布。異其機軸。今人見歐曾一二轉折。自詫能文。余嘗見小兒搏泥爲銃。擊之石上。鏗然有聲。泥多者聲宏。若以一九爲擊。總使能響。其聲幾何。此古人所貴讀萬卷也。

敘事須有風韻。不可擔板。今人見此。遂以爲小說伎倆。不觀晉書南北史列傳。每寫一二無關係之

事使其人之精神生動。此類上三毫也。史遷、伯夷、孟子、屈原等傳，俱以風韻勝。其填尚書國策者，稍覺擔板矣。

文必本之六經，始有根柢。惟劉向、曾子固多引經語。至於韓歐融聖人之意而出之，不必用經，自然經術之文也。近見巨子動將經文填塞，以希經術，去之遠矣。

文以理爲主，而情不至，則亦理之郭廓耳。廬陵之志交友，無不嗚咽。子厚之言身世，莫不悽愴。郝臨川之處真州，戴剡源之人故都，其言皆能惻惻動人。古今自有一種文章，不可磨滅。真是天若有情，天亦老者。而世不乏堂堂之陣，正正之旗，皆以大文目之。顧其中無可移人之情者，所謂剗然無物者也。

作文不可倒卻架子。爲二氏之文，須如堂上之人，分別堂下臧否。韓歐曾王，莫不皆然。東坡稍稍放寬。至於宋景濂爲大浮屠塔銘，和身倒入，便非儒者氣象。王元美爲章質詰，以刻工例之，微明伯虎太函傳，查八十許以節俠，抑又下矣。

所謂文者，未有不寫其心之明者也。心苟未明，劬勞憔悴於章句之間，不過枝葉耳。無所附之而生，故古今來，不必文人始有至文。凡九流百家，以其所明者沛然隨地湧出，便是至文。

先君子喜藏古書。人間祕本。半皆寓目。金石碑帖。亦一見卽辨真贋。曾著古今碑帖考四卷。金石訂例四卷。甫欲鋟版。適同治庚申。髮逆陷虞陽。稿遂散失。不肯不善保護。致手澤蕩然。終身飲恨。惟金石訂例一書。僅僅於流離轉徙中。攜出。廷爵近刻叢書。謹列初編。以備體例。

男
廷爵 謹識

叢書集成初編

金石要例（及其他二種）

中華書局出版發行

（北京王府井大街三十六號）

秦皇島市資料印刷廠印刷

一九八五年北京新一版

開本：七八七乘二〇九二毫米三十二分之一

統一書號：一七〇一八·一五一

